



Bai yu mekim planti moa skon na kamapim moa moni

Mekim ol skon bilon maket wantaim flour ol trupla lain bilong bakeri save usim



High Protein Bakers Flour PROFESSIONAL
Vitamin
Flame
goodman fielder
25kg NET WEIGHT

Planti manmeri i no ...maski kantri i kisim gavman sevis winim 41 yias

TAIM planti manmeri long PNG i amamas long seleberetim namba 41 independens de bilong kantri, Katolik Bisops Konfrens i lukim olsem planti manmeri i no kisim gavman sevis na lukim developmen maski PNG i winim 41 krismas na risos i pulap.

Jeneral Seketeri bilong Katolik Bisops Konfrens, Pater Victor Roche, i tok planti gutpela developmen i kamap long PNG insait long dispela 41 yia tasol ol dispela developmen i kamap long siti tasol.

"Yes, Gavman i mekim nupela rot, bris, skul na haus sik. Planti bilong dispela developmen i kamap long siti tasol," Fr Roche i tok.

Fr Roche i tok ol siti i lukim planti gutpela developmen i kirap tasol ol rurel ples na komyuniti we planti manmeri i stap long en, i no lukim gutpela gavman sevis na developmen.

"Planti manmeri i save stap long ples na long rurel eria. Moa long 80 pesen bilong populesen i stap long rurel eria i no lukim gavman sevis na developmen," em i tok.

Em i tok pasin nogut olsem pasin raskol, korapsen na sanguma pasin i wok long kamap bikpela, wankain olsem arapela ol pasin nogut long komyuniti.

"PNG i makim namba 41 independens de. Em i gutpela taim long yumi manmeri bilong dispela kantri i lukluk go bek gen long wanem ol samting yumi kisim long dispela 41 yia.

"Kantri i gat planti save manmeri husat i go skul long bikpela skul. Namba bilong ol tisa, nes, dokta na arapela ol save manmeri i wok long gro i go moa.

"Dispela em i wanpela gutpela samting. Tripela yunivesiti bilong gavman i nau op gen na dispela i helpim ol pikinini bilong yumi long go bek gen long skul," em i tok.



Ol Black Brothers kam raun

Black Brothers i kam bek gen long ples we ol save laikim tumas na mekim olsem asples bilong ol. Black Brothers em wanpela popula ben long Wes Papua na i katim planti keset bilong ol wantaim ol naispela singsing bilong ol. Planti ol lapun bilong bipo na sampela ol namel manmeri bai save gut long nem na hotpela sing bilong ol we save kamap long ol redio stesin bilong bipo long 1980 na 1990. Dispela ben i kam long PNG na pilai insait long 1980s taim ol mekim raun bilong ol. Nau ol kam bek long amamasim 41 yia long PNG long Pot Mosbi taim Gavana bilong NCD, Powes Parkop i askim ol. Tupela bilong ben memba i lusim laip bilong ol na wanpela i gat bikpela sik tasol ol tripela original ben memba i kam wantaim ol pikinini bilong ol. Ol ben memba i flai long Vanuatu, Australia, Wes Papua na Jakata na kam bung long Pot Mosbi long mekim wanpela na bikpela so long amamasim 41 yia bilong PNG na ol pipel bilong Mosbi. *Poto Stori Nicky Bernard.*



GET A MICARD OR MICASH ON YOUR MOBILE IT'S YOUR CHOICE!

www.microbank.com.pg



NSO statim DHS sevei trening long kantri

Frieda Sila Kana i raitim

NESENEL Statistiks Opis (NSO) i makim pinis ol opisa bilong wokim Demograpik na Helt Sevei (DHS) long kantri stat long dispela mun. Ol i stat long holim ol trening bilong ol opisa bilong wokim ol intaviu wantaim ol supevaisa bilong ol long dispela wik Mande long ol bikpela senta bilong kantri.

Long Mande 12 Septemba, Nesanel Stetistisen, Roko Koloma i bin opim trening bilong Sentral Provins na Nesanel Kepital sevei tim. Sentral Provins i holim trening long Dixie Bangalow long 14-Mail na ol i holim trening bilong NCD long Granville Hotel long 6-Mail.

I gat 26 man na meri husat i bin kamap long trening bilong Nesanel Kepital Distrik DHS trening, 13 meri na 13 man. Dispela trening bai helpim ol intaviua na ol supevaisa long lainim wei bilong toktok long ol pipel insait long sevei na long wei bilong pulimapim ol fom



Mista Roko Koloma, Nesanel Statistisen i toktok long ol lain i kisim trening long Granville Hotel long dispela wik. Poto: Frieda Sila Kana.

we Nesanel Statistik opis i givim ol long mekim.

Bihain long tripela wik trening ol dispela lain wantaim olgeta nara-

pela lain husat i kisim trening long olgeta provins long kantri bai go aut long ol ples na setelmen we ol bai makim sampela haus we ol bai

kisim stori bilong ol mama, papa na pikinini. Insait long NCD bai ol i kisim 35 haus na long olgeta hap bilong kantri ol i makim long kisim 19200 haus olgeta.

Dispela sevei em i go wantaim 2016 wol sevei bilong namba bilong ol pipel moa long en ol mama na ol pikinini long helt na nutrisen. Olgeta toktok na stori we ol lain bai kisim na bungim i go long NSO bai kamap olsem as bilong ol gavman na NGO na ol narapela lain long yusim ol dispela namba na toksave bilong ol pipel long mekim ol disisen bilong ol polisi na ol mani we bai ol i yusim long mekim wok developmen. Wantaim ol risal bilong dispela sevei ol intanesenel risetsa tu bai inap long yusim ol databes long wokim ol risets wok bilong ol.

Wok bilong intaviu sampel bai stat long Septemba 15 na wok tru bai stat long Oktoba na go pinis long mun Desemba, 2016.

Nesanel Statistisen Roko Koloma i tok dispela em i namba 3 DHS

trening ol i mekim. Narapela tupela i bin kamap long yia 1996 na 2006. Ol dispela kain sevei i save kamap namel long ol taim bilong wokim nesanel senses.

Mista Koloma i tok, Demografi na Helt Sevei em i sampel sevei tasol na em i minim olsem ol intaviu lain bai i no inap go long olgeta haus na olgeta hauslain long kantri, no gat. Ol bai makim tasol wan wan haus long ol wan wan distrik na kamapim piksa bilong wanem kain hevi na sevis i stap long ol dispela ples.

Dispela em i impoten sevei na NSO i laik tromoi toksave olsem ol pipel i mas klia long dispela na givim taim bilong ol long taim ol dispela lain i kam raun long haus lain. Em i impoten long kantri bikos ol gavman na ol narapela lain bilong helpim pipel bai inap long mekim ol rait disisen long polisi na mani long sapotim ol developmen gol olsem Midium Tem na Sas-tenebel Developmen Gols.

Potape kamap ekting gavana bilong Hela

NUPELA ekting Gavana bilong Hela Provins em i memba bilong Komo-Margarima, Francis Potape.

Ol 9-pela memba bilong Hela Provinsal Asembli i votim Mista Potape i kamap nupela ekting gavana long Tunde long dispela wik.

Memba bilong Koroba-Lake Kopiago, Philip Undialu, husat inap long salensim em, i no bin go sindaun long



Nupela Gavana bilong Hela, Francis Potape

asembli miting long Tari.

Memba bilong Tari-Pori na Fainens Minista,

James Marape, mausman bilong ol sios long provinsal asembli, Olene Yawai, na Presiden bilong Pori LLG, Charlie Apalu, i no bin go long asembli miting long makim nupela gavana.

Hela Provinsal Asembli i gat 13 memba husat inap long vot. Arapela 5-pela

memba em ol kausil presiden LLG ileksen bilong ol i bin feil o i no bin kamap gut aninit long lo, na Suprim Kot i no luksave long ol.

Long las wik Tunde, Suprim Kot long Waigani i bin tokim Mista Potape na memba bilong Koroba-Lake Kopiago, Philip Undialu, long go bek long ileksen bikos tupela wantaim i no bin bihainim lo stret long kamap gavana.

Kot sistem mas stap em yet

PRAIM Minista Peter O'Neill i tok sistem bilong lo na kot insait long kantri bai stap strong na stap stret sapos kot sistem em i indipenden na em i stap em yet.

Mista O'Neill i tok strongpela na stretpela kot sistem i save holim gut kantri na i save bringim developmen taim ol manmeri na gavman i bihainim mama lo na arapela lo.

Em i mekim dispela toktok long Mande dispela wik taim em i opim wanpela bung bilong ol Sif Jastis bilong ol Pasifik ailan kantri long Pot Mosbi.



Praim Minista Peter O'Neill

"Yumi mas luksave gut long gutpela wok ol kot i save mekim. Planti manmeri i no save gut long gutpela bilong kot sistem.

"Kot sistem i stap na laip bilong manmeri i stap gut. Tasol yumi mas apim level bilong edukesen long helpim ol wok manmeri long kot," Mista O'Neill i tok.

Em i tok planti nupela senis i wok long kamap long teknoloji na dispela i kamapim nid bilong apim level bilong edukesen long helpim ol wok manmeri.

"Teknologi em i wanpela bikpela samting. Kot sistem bilong yumi mas luksave long dispela na senis wantaim nupela teknoloji," Mista O'Neill i tok.

Em i tok papa bilong em, Brain O'Neill, i bin wok olsem mejjstret long Hailans long planti yia, na dispela taim em i bin luksave long gutpela wok kot sistem i save mekim.

"Papa bilong mi i bin wok olsem mejjstret long lalibu-Pangia, long Mt Hagen na em i bin wok planti yia long Goroka.

"Mi bin luksave long gutpela na namba wan wok kot sistem i save mekim long kantri bilong yumi," Mista O'Neill i tok.

Maru tokim Madang gavman long stretim hevi bilong lo na oda pastaim ...na bringim ol investa

James G. Kila i raitim

MINISTA bilong Tred, Komes na Indastri, Richard Maru i givim bikpela salens na tokaut stret long ol lida bilong Madang provins olsem ol mas stretim hevi bilong lo na oda pastaim long ol i askim long ol investa i go long provins bilong ol.

Minista Maru i bin givim strongpela toktok bilong em long las wik Trinde taim em i givim toktok bilong em long opim Madang Invesmen Samit.

Dispela samit em Madang provinsal gavman aninit long projek menesmen yunit bilong en ol i kolim Ramu Developmen Faundes-sen (RDF) i go pas long en.

Long taim bilong opim samit Minista bilong Petroleum na Eneji na Memba bilong Madang, Nixon Duban wantaim Memba bilong Usino-Bundi na vais minista bilong



Madang Gavana Jim Kas givim bilum long Minista Richard Maru.

Stet Invesmen na Pablik Entaprais, Anton Yagama na Madang gavana, Jim Kas i bin stap.

Mista Maru i tok stret olsem Madang taun i gat bikpela hevi i stap yet long ol setelmen na ol arapela samting.

Em i tokaut stret olsem Madang

pipel em ol gutpela lain bilongj stap isi, tasol ol lain bilong ol arapela provins husat nau i stap long ol setelmen arere na insait long taun i wok long kamapim hevi planti taim tumas na bagarapim gutpela nem bilong Madang.

Em i tokaut stret olsem hevi bi-

long lo na oda em bikpela tru long Madang na sapos provinsal gavman i laik bringim ol investa long go wokim bisnis long Madang, em i mas lukluk moa long stretim ol hevi pastaim. Moabeta Madang gavman i mas redim plen bilong en long wokim kamap mobail skwat polis bareks long Madang long daunim hevi bilong lo na oda.

Mista Maru i tokaut stret olsem em yet i marit long Madang provins na em save go kam long Madang long lukim ol tambu na famili na em no save amamas long hevi bilong lo na oda long Madang taun.

Dispela namba wan Madang Invesmen Samit long las wik stat long Trinde i go Fraide i lukim ol bisnis na ol gavman i givim ripot bilong ol long wanem wok ol i mekim long provins na wanem tingting bilong ol long invesmen long provins.

No ken larim ol lenona kisim dinau

Oposisen laikim Fiji na PNG stretim hevi hariap

NOKEN larim ol lenona bilong Angore PDL 8 i kisim ol samt-ing long dinau, wan-pela lenona lida i tok.



Mista Akipe

Siaman bilong Angore Wellhead Leadership Committee (AWLC), Hari John Akipe, i givim dispela tok lukaut long ol manmeri husat i wok long givim mani, haia kar, haus, na meri long sampela ol man husat i giaman na tok ol i papagraun bilong Angore ges fil.

Mista Akipe, husat i Jeneral Menesa bilong Angore Special Purpose Authority (ASPA), i tok sampela ol manmeri na ol bisnis manmeri long Lae, Simbu, Goroka, Jiwaka, Wabag, Mt Hagen, Mendi na Pot Mosbi i wok long givim mani, kar, meri

na haus long sampela ol man husat i wok ol i papagraun bilong Angore.

"Jastis Ambeng Kandakasi i bin kamapim Oltanativ Dispiut Risolusen (ADR) long dispela yia we em i painim 49 klen o ol wanpisin insait long Angore PDL 8.

"Tasol foapela ken

tasol i papa bilong welhet. Welhet 1A, A na B i stap long graun bilong Halapura, Imiki, Hurupali na Pereke klen.

"Dispela i mekim mipela i papa bilong welhet. Jastis Kandakasi i luksave long dispela. Mipela i tokim gavman pinis olsem lidasip bilong welhet bai stap long han bilong mipela yet," Mista Akipe i tok.

Em i tok dispela foapela klen na AWLC i no gat wanpela dinau long ol manmeri.

"Sapos yu wanpela sevis provaida i givim dinau mani, dinau haia kar, hotel rum long dinau, na meri long dinau, mi sori tru," Mista Akipe i tok.

OPOSISEN bilong PNG na Fiji i singautim tupela gavman long tok-tok gut na stretim dispela toktok bilong tred.

Bihain long Fiji i les long kisim sampela ol prodak bilong PNG olsem Ox & Palm, Trukai Rice na Snax bisket, Minista bilong Tred, Komes na Industri, Richard Maru, i bin tok-tok strong long pasim tred namel long tupela kantri na stopim Fiji long salim ol prodak bilong em i kam insait long PNG.

Mausman bilong Oposisen long Fiji, Iliame Gavoka, i tok Fiji na PNG wantaim i stap long Melanesian Spearhead Group (MSG) tupela i mas bihainim ol polisi bilong tred aninit long MSG grup.

Mista Gavoka i luk-save olsem PNG i givim sans long planti kampani bilong Fiji long mekim bisnis na inves long bikpela sais maket long hia.

"Sapos Gavman bilong Fiji i no stretim gut tok-tok, i luk olsem ol dispela kampani bai kisim taim na ol bai no inap long mekim gut," em i tok.

Mista Gavoka i givim strongpela tok lukaut long Gavman bilong Fiji i no ken strongim sait long pasim tred, tasol i mas sindaun gut na tok-tok wantaim ol opisal bilong PNG Gavman na stretim dispela hevi.

"Dispela samtig i no kamap asde tasol. Em i no kamap nau tasol. Em i kamap long taim, na em i nidim gutpela lidasip long tupela sait

wantaim. Tupela minista bilong tred long Fiji na PNG i mas toktok gut na stretim dispela hevi," Mista Gavoka i tok.

Mausman bilong PNG Oposisen, Ken Fairweather, i tok tupela gavman bilong PNG na Fiji i no ken larim dispela hevi i kamap bikpela.

"Mi laikim tupela gavman long mekim wok. Tupela gavman bilong PNG na Fiji i mas sindaun gut na toktok gut long stretim dispela hevi.

"Ol bisnis haus na ol pipel bilong yumi long tupela kantri bai kisim taim na kisim hevi sapos gavman i no mekim wanpela gutpela toktok long stretim dispela hevi," Mista Fairweather i tok.

Long wankain taim,

Gavana bilong NCD, Powes Parkop, i salensim Minista Maru na PNG Gavman long lukluk long ol maket long Asia bikos Fiji em i liklik maket.

"Populesen bilong Fiji em i liklik. Yu tok long Indonesia long narapela sait bilong boda, ol i gat moa long 250 milien manmeri. Na ol i save laikim tru ol prodak bilong PNG.

"Filipins na Saina tu i save laikim ol prodak bilong PNG. Ol i save kaikai wankain kaikai olsem yumi save kaikai.

"Namba bilong manmeri long Asia em i bikpela moa na i winim namba bilong ol manmeri long Fiji. Minista Maru i no ken westim taim na kros o toktok mo wantaim Fiji," Mista Parkop i tok.

Papa bilong Curtain Bros i dai

MAN husat i bin statim biknem konstraksen kampani, Curtain Bros PNG Limited, i dai long Townsville, Australia long las wik Sande apinun.

Sir Mick Curtain, husat i bin stap long PNG long moa long 50 yia, na statim biknem konstraksen binis bilong em long hia, i bin sik long-pela taim na i dai long Sande long 3:30 apinun long Townsville haus sik long Australia.

Krismas bilong em i bin 75 taim em i dai. Meri bilong em Lady Jennifer Curtain wantaim ol pikinini bilong em Peter, Louise, David, Christopher na Sean i bin stap wantaim em long haus sik taim em i bin lusim laip.

Praim Minista Peter O'Neill i salim tok sori long em i go long

Lady Jennifer wantaim ol pikinini na olgeta wok manmeri bilong Curtain Bros long PNG na Australia wantaim.

"Mi makim maus bilong pipel bilong PNG na Gavman na salim tok sori i go long meri bilong leit Sir Mick, Jennifer Curtain wantaim ol pikinini, Peter, Louise, David Christopher na Sean.

"Sir Mick i bin mekim planti gutpela samtig long kirapim kantri bilong yumi. Taim planti ol manmeri bilong Australia i go bek, Sir Mick i bin stap bek long PNG na statim konstraksen kampani bilong em, Curtain Bros PNG Limited," Mista O'Neill i tok.

Mista O'Neill i tok Sir Mick em i wanpela strongpela poroman na patna bilong PNG, na kantri bai


lusim em.

"Kampani bilong em i bringim planti gutpela developmen long PNG. Sir Mick Curtain i gat planti han mak long konstraksen na injiniaring industri long PNG," Mista O'Neill i tok.

Mista O'Neill i tok Curtain Bros i bin kirapim planti wok long taim bilong konstraksen wok PNG LNG Projek.

"Narapela bikpela samtig em i mekim, em i kirapim Motukea ailan, we gavman bai kamapim bikpela intanesenel sip bris bilong kantri," Mista O'Neill i tok.

Jeneral Menesa bilong Curtain Bros, Justin McGann, i tok PNG i lusim wanpela man strongpela man husat i save laik long apim nem bilong dispela kantri na pro-



Sir Mick Curtain i stap long PNG moa long 50 yia.

motim PNG olsem wanpela gutpela kantri bilong mekim invesmen.

"Long tingim em na riskpekim em, mipela bai pinisim sampela ol bikpela projek em yet i bin laikim Curtain Bros long mekim.

"Em i no bin kam long Motukea 7-pela mun olgeta taim em i bin sik na mi sori tru olsem em i no kam-

bek gen long hia," Mista McGann i tok.

Minista bilong Sports, Justin Tkatchenko, i sori no gut tru taim em i harim olsem Sir Mick Curtain i dai.

"Mi laiksaim tok sori i go long meri bilong em na ol pikinini na olgeta wok manmeri bilong Curtain Bros.

SMART SOLUTIONS FOR SMALL BUSINESS

"With the **BSP Smart Business Package**, I offer the right mix of payment options for my customers; **EFTPoS, Mobile and Internet Banking** and I use a **Smart Business Debit Card** for my supplier payments.

Plus, the Smart Business current account provided transaction records that were used to support my **BSP Smart Business Loan** application to help me expand my Business."

Helen Victor
Owner of Zoenani Gas Ltd
BSP Smart Business customer



WE ARE **BSP**

US kampani tokaut long wokim masin faktori long Madang

James G. Kila i raitim

WANPELA bikpela kampani bilong Amerika i tokaut las wik olsem em bai kirapim wanpela bikpela faktori bilong en long Madang na long wokim ol bikpela masin na kontraksen ikwipmen long salim i go ovasis.

Nem bilong dispela kampani em Powerplus Grup Inc, na em i gat bikpela ol bisnis long planti hap long wol.

Jeneral Menesa na wanpela dairekta bilong Powerplus Grup Inc, Gerard Lau i bin i tokaut long plen na invesmen bilong ol long Madang Invesmen Samit long Madang Risot Hotel las wik Fraide.

Tokaut bilong dispela bikpela invesmen i kirapim bel amamas long ol lain long Madang gavman long dispela bisnis kibung. Olgeta lain i amamas tru na i tok em wanpela nupela kain invesmen long kamap long Madang provins.

Mista Lau i tokaut olsem dispela brens bilong kampani long Madang ol i plen long kamapim em ol bai kolim Powerplus Pacific Limited.

Madang provinsal gavman i givim pinis wanpela eria long not kos rot long Madang we Powerplus Grup bai wokim bikpela faktori bilong en.

Mista Lau i tokaut tu olsem ol bai go insait long wokim kamap faktori o asembli lain na salim ol prodak bilong ol i go ovasis. Ol bai kirapim tu teknikal na developmen senta bilong ol long Madang na kisim samting olsem 500 wokman.

Em i no tokaut long hamas mani invesmen ol bai putim long kirapim wok yet.

Tasol Mista Lau i tokaut olsem ol namba wan prodak bilong en long maket nau em ol wil-loda, ekskeveta, buldosa, egrikalsa trakta, bekho, motogreida, krein, foklip na ol masin bilong brukim ston.

Powerplus Grup Inkoporetad i bin stat pastaim tru long 1973 olsem wanpela kontraksen ikwipmen na speapats saplaia. Nau em i gro bikpela na i salim ol prodak na ikwipmen bilong en long olgeta hap bilong wol. Powerplus Grup em i ol inkopretim long Yunaited



Jeneral Menesa bilong Powerplus Grup Inc. Gerard Lau i sanap wantaim Gavana bilong Madang, Jim Kas (raithan) na Memba bilong Usino-Bundi na vais minista bilong Pablik Entaprais na Stet Invesmen, Anton Yagama. Foto: James G. Kila

Stet ov Amerika (USA) long 2001.

Mista Lau i tokaut olsem Powerplus i winim bel bilong ol kastoma long USA taim em i wokim sampela ol samting bilong ol US ami. Tude Powerplus i givim bikpela sevis na prodak long kontraksen ikwipmen na sevim nids bilong planti ol bikpela kampani long wol

Em i tokaut olsem tude Powerplus Grup i gat ol lain wokman na

ejen bilong em i stap long moa long wan handet kantri long wol. Ol bren o prodak em i wokim i winim planti awot pinis long wol.

Mista Lau i tok Powerplus Grup i luksave long ol maket we i wok long kirap insait long Pasifik na i plen long wokim faktori bilong em long Madang.

Dispela faktori bai salim ol prodak bilong Powerplus i go long

Australia, Indonesia New Zealand, East Timor, Solomon Ailans, Vanuatu, Fiji, Noumea, Tonga na ol arapela kantri.

Em i tok egen bilong ol long Madang nau yet em John Kam-bual, husat em menesing dairekta bilong Magro Motors long Madang, husat i salim sampela ol prodak bilong Powerplus Grup nau yet.

Nupela Judisel menesmen sistem

Charlpetson Koi i raitim

OL het bilong Judiseri long Pasifik rijon i bung long Pot Mosbi long Pasifik Judiseri Konprens 2016 insait

long wanpela wik stat long Mande dispela wik.

Insait long dispela konprens ol jas bai toktok long ol judiseri sistem long Pasifik na ol rot bilong wok

bung wantaim ol narapela kantri.

I gat 15 kantri i stap insait long dispela Pasifik Judisel Konprens we Papua Niugini i go pas long en.

Dispela konprens i stat wantaim het tok 'Enhancing the quality of Justice in the Pacific', o 'Strongim kwaliti bilong Jastis long Pasifik'.

Sif Jastis Sir Salamo i tok het tok i toktok long kwaliti bilong Jastis Sevis na em i tok long mining bilong en olsem olgeta pipel i ken kisim jastis na i no ken wan sait.

Em i tok wanpela nupela judisel keis menesmen ol i kolim long keis doketing sistem ol i mas gat.

"Dispela judisel keis menesmen bai i senisim ples bilong olupela we bai i mekim ol jas long mekim wok bilong ol," Sif Jastis Sir Salamo i tok.

Sir Salamo i tok dispela bai i mekim na ol jas bai mekim wok bilong ol yet na bai ol i wokim gut.

"Bai ol sif jastis i luksave olsem ol jas i wokim wok bilong ol tru na insait long dispela keis doketing sistem," Sir Salamo i tok moa.

Tasol, em i tok dispela sistem i nidim wanpela gutpela data-beis wantaim teknoloji long sapotim.

Praim Minista i opim Pasifik Judiseri Konprens

Charlpetson Koi i raitim

Praim Minista Peter O'Neill i bin opim Pasifik Judisel Konprens long Mande insait long nupela Konvesen Senta long Waigani, we olgeta jas bilong ol Pasik kantri i bin kam bung.

Praim Minista i mekim toktok long opim konprens olsem na em i toktok long ol bikpela samting long sait bilong judiseri sistem long PNG.

Praim Minista Peter O'Neill i tok welkam long ol jas long dispela 4-pela de Pasifik Judisel Konprens.

Praim Minista i tok tok long ol wok bilong judiseri we gavman i mekim insait long kantri.

Em i tok gavman i bihainim wanpela nupela rot long kisim ol kot i go long ol provins.

"Gavman i lukim nau



Praim Minista Peter O'Neill

olsem judiseri sistem mas i go long olgeta hap ausait long ol provins tu na i no ken lukluk long Sentral Gavman

olgeta taim. Olsem na mipela i mekim ol nupela kot haus insait long ol provins long kantri," Mista O'Neill i tok.

Em i tok judiseri sistem long PNG em i indipenden na Nesenel Eksketiv i no save bosim em.

Praim Minista i toktok long ol salens long kantri long sait bilong teknoloji we judiseri i nidim long bringim save bilong lo long ol pipel insait long kantri.

"Yumi i mas lainim ol pipel bilong yumi long kantri, ol yangpela manmeri na ol sumatin long save gut long lo. Wanpela bikpela salens em long sait bilong ol nupela teknoloji i wok long kamap olsem Facebook na ol narapela," Mista O'Neill i tok.



Wantok niuspepa i laikim ol eijen insait long Madang, Kimbe, Kundiawa, Wewak, Jiwaka, Tari, Kiunga, Tabubil, Daru, Kerema, Manus, Kavieng na Alotau long salim niuspepa bilong mipela.

Mipela i laikim ol Eijen long distributim niuspepa long dispela ol ples antap hariap tru!

Sapos yu ting yu em rait man o meri long dispela wok, ringim Sekulesen Supavisor bilong mipela long Fon: **325 2500 o Mobail namba: 7384 6688 o email i kam long: seovo@wantokniuspepa.com**



Pasifik disabiliti meri i save bungim klaimet senis wari

Caroline Tiriman i raitim

WANPELA bikpela miting bilong ol meri i go het nau long Brazil i harim olsem ol meri bilong Pasifik i gat wari long bodi bilong ol o stap wantaim disabiliti we ol i wok long bungim em hevi bilong klaimet senis i kamapim.

long rijon long kamapim ol lo bilong helpim ol wantaim ol dispela wari, long wanem, solwara i bagarapim pinis ol ples we ol i save mekim gaden klostu long ples long nambis o long ol liklik ailan.

Meri lida long People living with disabiliti long Papua Niugini na bot memba bilong Pacific People living

with disabiliti, Ipul Powaseu i mekim dispela askim long wanpela toktok em i givim long dispela konpres long klaimet jastis.

Samting olsem 2,000 meri husat i makim ol rait bilong ol meri na sosel jastis muvmen i stap long dispela konpres long Salvador, biktaun bilong Bahia stet long Brazil.

Solomon Ailan polis i laik rausim ol Wol Woa 2 bom

Caroline Tiriman i raitim

OL LAIN bilong Royal Solomon Ailan Polis Fos nau i wok long askim ol pipel long tok save kwik sapos ol i painim ol bom long graun bilong ol.

Askim bilong ol i bihainim wok em polis wantaim helpim i kam long ol mansave bilong Australia,

Nu Silan, Canada na Yunaitet Kingdom long rausim ol bom we ol i no bin pairap long Wol Woa 2.

Dispela wok bai stat long wik bihain i go inap long pinis long mun Oktoba.

Solomon Ailan i bin kisim taim stret long bikpela pait long Wol Woa 2 taim ol lain ami bilong Amerika, Australia, Jemani na Japan i bin

pait long hap na lusim planti long ol dispela samting bilong pait long graun na tu long ol solwara.

Polis Saiden, Hadley Muna, i go pas long polis grup em i mekim dispela wok na em i tokim Redio Australia olsem ol i laik rausim ol dispela bom long wanem sampela pipel i save dai long ol taim ol i pairap.

PNG i mas kamapim ol Marin Konsevesen eria

Caroline Tiriman i raitim

WANPELA mansave bilong helpim ol pipel long Papua Niugini i lukautim gut ol trausel i askim strong nesenel gavman long kamapim ol marine konsevesen eria long ol solwara bilong lukautim ol trausel.

Wenceslaus Magun bilong Mas Kagin Tapani Association, wanpela envairomen grup i mekim dispela toktok

bihain tingting bilong wanpela meri bilong Australia long statim wok bilong painim mani long helpim ol pipel bilong PNG long lukautim gut trausel.

Ange Amon i tok em i laik mekim dispela wok long wanem namba bilong ol long PNG i bin go daun tru.

Trausel em i stap olsem hap bilong kalsa bilong planti pipel long Pasifik rijon wantaim long Papua Niugini

we ol i save yusim long kaikai, na tu long ol bikpela bung bilong makim marit o makim dai o makim taim bilong ol mama i karim ol pikinini.

Mista Magun i tokim Redio Australia olsem long wik i go pinis em i bin helpim wanpela man bilong Pomio long Is Nu Briten provins long statim ol kempen long lukautim ol trausel long ples bilong en.

PNG 2017 ileksen sevei

John Papik i raitim

WANPELA sevei o wok painimaut long Papua Niugini nau i painim tingting bilong pipel long rot we ol bai vot long ileksen long yia bihain 2017 long makim nupela palamen.

Long taim bilong ileksen pipel i save gat ol kain kain tingting long givim vot bilong ol i go long wanem kendidet ol i save laikim long ilektoret bilong ol.

Nau tupela akademik bilong Yunivesiti bilong PNG Dokta Lawrence Sause na

Dokta Leo Marai i bin tingting long kamapim wanpela sevei long painim aut gut trupela tingting bilong ol pipel long taim bilong ileksen.

PNG i save holim ol ileksen bihain long 5-pela yia. Las taim ol pipel bilong kantri i bin vot em long 2012.

Ol Pasifik etlit i stap long Rio Paralimpik Gem

Caroline Tiriman i raitim

PARALIMPIK Gem i bin stat tude wantaim opening seremoni long Ro de Janero long Brazil, wantaim ol kain samting olsem paiawok na ol etlit i bin mas long Maracana stediam.

Klostu olgeta kantri long wol i salim ol tim bilong ol long resis long dispela Gem, Rasia tasol i no stap long Gem bihainim ol wari bilong drag.

Ol Pasifik Ailan kantri tu i salim ol paralimpik spot lain bilong ol na PNG i salim tu-

pela rana.

Ipul Powaseu, meri i go pas long People Living with disabiliti long PNG na Pasifik rijon i stap long wanpela miting long Brazil. Em i gat ol dispela tingting bilong em long spot na ol pipel i stap wantaim disabiliti.

Ijip i larim humen rait ektivis i go fri

OL i larim humen rait ektivis, Ahmad Abdullah i go fri bihain long ol i bin holim em long tupela wik long Ijip.

Ol i bin holim pasim Abdullah, em bosman bilong Ijip Komisn bilong Rait na Fridom (ECRF), long haus bilong em pastaim long wanpela protes ol i bin plenim long holim egensim trense bilong tupela ailan long Saudi Arabia long Epril 25.

Ol i sutim tok long en long ol kain sas we em i ken kalabus long laip.

Em ol samting olsem kirapim tingting bilong ol pipel long kamap vailens, singaut long rausim nau gav-



Wanpela man i holim poto bilong Giulio Regeni taim pipel i sindaun ausait long embasi bilong Ijip long Rom las Fraide.

man bilong Ijip na memba i tok larim i go fri bilong Abdullah i gutpela, i gutpela long ol i rausim ol sas ol i wokim long en.

Hilary Clinton i pilim sik na lusim 9/11 memoriel sevis

HILLARY Clinton i gat sik niunomia na i bin malolo liklik long kempen bilong em bihain em i bin pilim sik las wik long taim bilong sevis long teroris atek i bin daunim twin tawa long Nu Yok, Amerika long yia 2001 na kilim dai samting olsem 3000 pipel.

Misis Clinton i bin lusim seremoni na go malolo long haus bilong pikinini meri bilong em.

Oposisen bilong em long resis long sia bilong US presiden, Donald Trump i gat 79 krismas, i tok helt bilong Misis Clinton i no gutpela tumas na em i no fit long kamap presiden.

Tasol dokta bilong Misis Clinton husta i gat 68 krismas, Dokta Bardack, i tok helt bilong Misis Clinton i



Hillary Clinton i lusim 9/11 memoriel lotu sevis.

gutpela long holim sia bilong presiden bilong Amerika. Ol ripot i tok i mas gat gutpela helt/medikal ripot long tupela kendidet, Misis Clinton na Mista Trump.



Ol i bin pilim guria long Uganda bihain long 5.7 mak guria i bin kamap long Nsunga taun i stap long notwes bilong Lek Victoria.

SAMTING olsem 13 pipel i dai pinis na 203 i kisim bagarap long bikpela guria long mak bilong 5.7 i bin kamap long Tanzania, ol

ripot i tok. Samting olsem 10-pela haus i pundaun na bagarap, tasol no gat man i dai o kisim bagarap. Ol ripot i tok Gret Leik rijon i save gat planti guria, tasol ol i no save bikpela olsem dispela i kamap nau, Ol i pilim dispela Giolojikel Sevei i tok.

ANGAU kisim ol medikal saplai

ANGAU Memoriel haus sik long Lae i bin kisim ol medikal saplai na ikwipmen inap long mani mak bilong K2 milien i kam long gavman bilong Australia, wanpela moa taim gen long stretim ol ples bilong wok.

Ol i bin kisim ol ikwipmen bilong sekim ol sikman na meri na long katim ol sikman long operesen na tu ol wok samting bilong ol speselis long operesen tieta, ol wok samting bilong banisim old okta na nes i wok long operesen tieta na ol masin bilong wok.

Sif Eksekutiv Opisa bilong ANGAU haus sik, Dokta Christopher

Kenyhercz i amamas long lukim ol nupela medikal samting na ikwipmen na sapotim swok bilong givim sevis.

“Mipela i amamas long Australia i sapotim ANGAU. Tupela bilong ol 4-pela operesen tieta bilong mipela i no bin save wok inap tupela yia bikos ol ikwipmen i bin bagarap na haus sik i no inap long stretim,” Dokta Kenyhercz i tok.

Australia Hai Komisen Kaunsela Christine Sturrock i tokaut olsem dispela saplai em i wanpela hap bilong ol medikal ikwipmen we i kam wantaim bikipela moa

mekpas bilong ol wok we Australia i givim long ANGAU.

Namba wan hap bilong helpim i kam long Australia i stat pinis na sampela moa infrastraksa apgret i wok long kamap yet.

Ol dispela wok em nupela operesen tieta na wod, nupela dentis klinik, na senis bilong Lae Skul bilong Nesing.

Gavman bilong Australia i wok patnasip wantaim PNG gavman long kamapim gen

ANGAU haus sik em i hap bilong baileteral developmen koporesen program wantaim Papua Niugini.



Ekting Dairekta bilong Nesing, Sista Concilia Amol, na Australia Hai Komisen Kaunsela Christine Sturrock, ANGAU CEO, Dokta Christopher Kenyhercz na Ekting Dairekta Medikal Sevis Dokta Ruso Peroni wantaim ol medikal ikwipmen saplai long ANGAU haus sik.

Ok Tedi na DWU statim wok plesmen program



DWU 3rd yia RHS sumatin wantiam Kodineta bilong ol Frank Yagahe (putim orens ves) na Profesa Clement Malau wantaim OTML CEO Peter Graham na Tabubil Haus Edministreta, Margareth Samei, i sanap long fran bilong haus slip bilong ol man na meri sumatin.

OK TEDI Maining Limited (OTML) nau i wok bung wantaim Divine Word Yunivesiti long putim ol 3rd yia sumatin bilong Divain Wod Yunivesiti (DWU) RHS Rurel Helt Saiens long wok plesmen program stat wantaim 10-pela man na 10-pela meri sumatin long las mun.

Ol dispela 20 sumatin bilong Rurel Helt Saiens i bin go long Tabubil long lainim wei bilong stap long wok ples inap long 10-pela wik olgeta.

Long strongim dispela program, OTML wantaim DWU i bin opim ol sumatin haus slip unit long makim dispela RHS Wok Plesmen Program i stat.

Ol sumatin bai wok long Tabubil haus sik, Tabubil Eben Klinik, 4-pela main viles etpos, Matkonai helt senta arere long Tabubil Kiunga Haiwe na Monfort helt senta long Kiunga.

Profesa Clement Malau husat i bin opim DWU RHS wok plesmen program i givim tok salens long ol sumatin long ol i mas opim tingting bilong ol long helpim ol rurel pipel

bilong Westen provins.

OTML Menesing Dairekta na CEO Peter Graham i tok olsem maining kampani i gat gutpela patnasip wantaim DPHL long menesim wok bilong Tabubil haus sik na long bringim klinik na pablik helt sevis long ol wokman na wokmeri bilong kampani na tu long ol komyuniti i stap klostu long main.

Em i tok edukesen na helt em i namba wan invesmen bilong OTML long komyuniti bikos kampani i gat bilip olsem ol pipel em i bikipela samting long laip bilong kampani.

Mista Graham i salensim ol sumatin long kamap helt ke profesenel na strongim ol long wok long ol rurel ples i stap longwe long taun we i gat bikipela nid tasol ples bilong wok i no save gutpela tumas.

“PNG i sot long ol dokta husat i gat gutpela trening, ol nes na ol helt eksetensen opisa long ol rurel eria.

“Mipela i amamas long sapotim wok bilong DWU long bringim helt ke edukesen bilong en wantaim ol fasiliti we bai mekim ol sumatin na

ol profesenel i painim isi long kam long dispela hap.” Mista Graham i tok.

“Mipela laikim olsem dispela eksperiens long Tabubil bai mekim ol sumatin i laikim long kam bek gen long Westen Provins bihain long ol i greduet. Mi bilip ol dispela namba wan lain sumatin bai kamap gutpela piksa,” Mista Graham i tok.

Edministreta bilong Tabubil Haus sik, Margareth Samei, i tok wok plesmen program em i bin kamap tupela yia i go pinis taim pastaim DWU Presiden, Fr. Jan Czuba i gat bikipela laik na visen long gat ol gutpela helt fasiliti i stap long ol rurel ples we ol pipel i stap longwe tru long ol sevis.

Em i tok wok plesmen program em i wanpela praivet pablik patnasip bilong bringim ol pablik sevis wantaim wanbel bilong OTML na DWU long yusim Tabubil Haus sik bilong ol sumatin i ken wok.

“Long Janueri 2014 OTML i bin givim helt sevis menesmen bilong Tabubil Haus sik i go long DWU,” Mis Samei i tok.

YWAM Sip bringim heltke sevis long Madang

YWAM Medikal Sip, MV Pacific Link, nau i pinisim wok bilong en long Madang Provins we em i bin bringim 48,000 helt ke na trening sevis insait long 8-pela mun em i bin stap long hap.

MV Pacific Link wantaim ol volantia tim i bilong en i bin go aut long ol ples long Bogia, Sumkar, Madang na Rai Coast distrik na ol i bringim ol sevis long mani mak bilong K4.6 milien.

Dairekta bilong MV Pacific Link, Brett Curtis, i tok ran bilong MV Pacific Link long namba wan taim i go long Madang em i spesel.

“Plantip pipel i kisim helpim insait long 8-pela mun, olsem dispela meri, Luweng bilong KarKar Ailan, husat i gat wanpela hap skin i kamap long ai bilong en inap long lukluk gen bihain long em i kisim ai operesen antap long sip bilong mipela.

“Luweng i painim hat long stop long tok tenkyu long dokta bilong mipela bihain long ol i bin rausim dispela hap skin long ai bilong em. Em i isi long lusim tingting long wanem bikipela samting ai bilong yumi i save mekim long laip bilong yumi, inap taim yumi lukim wanpela man o meri husat i bin aipas na i lukluk gen. Em i gutpela long lukim long ai wanem samting i kamap long laip bilong Luweng.

“Mipela i amamas long ol volantia husat i bung wantaim mipela long olgeta hap bilong wol, na tu long ol gutpela dona bilong mipela wantaim Madang Provinsal Helt long wok wantaim mipela long mekim dispela



YWAM Medikal Sip MV Pasifik Link wantaim ol volantia kru bilong en.

ran bilong sip i kamap gutpela tu,” Mista Curtis i tok.

Ol narapela wok we ol i bin mekim insait long dispela 8-pela mun em long bringim moa long 5,803 imunaisesen o banis sut, 1,294 wok long ol tit na helt promosen i go long 5,293 pipel.

Madang Provins Dairekta bilong Helt, Markus Kachau, i tok wok bung wantaim YWAM Medikal Sips i strongim heltke wok long provins.

“Patnasip bilong mipela wantaim YWAM i kamapim bikipela sapot long helpim mipela long pinisim ol bikipela wok insait long helt plen bilong mipela. Ol helt woka bilong mipela i bin inap long wok wantaim YWAM Medikal Sip heltke volantia long bringim ol namba wan speselais helt sevis long sampela ples we i stap longwe tru long ol haus sik,” Mista Kachau i tok.

Wosera Gawi skul kisim Alcatel tablet

DIGICEL wantaim Wosera Gawi Distrik Developmen Atoriti i bin givim 200 Alcatel tablet kompiuta long 4-pela skul bilong Wosera Gawi Distrik long wik i go pinis.

Kwanjiviak, Kunjingini, Serengwandu na Nungwaia Praimeri Skul. Wan wan skul i kisim 50 Alcatel tablet. Dispela program bai kamap yet insait long distrik bikos Palamen memba bilong distrik, Joseph Yopyyopy i gat plen long givim aut moa tablet i go long 30 o moa praimeri skul insait long distrik.

Digicel i givim ol SIM kat long wan wan tablet. Kost bilong ol tablet na SIM kat i stap long mak bilong K100,000.

Digicel Menesing Dairekta, Mobile, Shivan Bhargava i tok, "Mipela i amamas tumas long givim ol skul sumatin sampela sans long gat ol samting bilong helpim ol long kisim skul na develop."

"Ol dispela sumatin nau bai inap go long internet laibreri, e-Granary. Em i wanpela internet laibreri we i gat ol samting bilong edukesen olsem vidio, harim toktok, buk, jeno na ol websait.

"Ol Alcatel tablet bai helpim moa long 3000 sumatin insait long rijon long konek long internet na long i gat inap samting we ol pikinini long ol narapela kantri i gat. Em bai givim tingting long sumatin



Shent Kiungui, Digicel Gavman mausman (raithan) i sekhan wantaim hetmasta bilong Kwanjiviak Praimeri Skul Cherumbim Waiu na memba bilong Wosera Gawi Distrik Joseph Yopyyopy i sanap na holim tablet wantaim Senia tisa bilong skul.

long skul strong long edukesen bilong ol insait long praimeri skul yet."

Shent McPhally Kiungui na Palamen Memba bilong Wosera Gawi Distrik Joseph Yopyyopy i bin go long givim ol dispela tablet. Ol hetmasta, tisa, bod memba na ol papamama bilong wan wan skul i bin kam bung wantaim ol opisa bilong distrik, Is Sepik edministreta na ol bikpela edukesen opisa long amamasim dispela de.

Hetmasta bilong Kwanjiviak Praimeri Skul, Cherumbim

Waiu, i tok tenkyu long memba bilong Wosera Gawi, Joseph Yopyyopy na Digicel PNG long bringim e-laibreri i go long ol ruel eria bilong distrik bilong ol.

"Ol dispela tablet bai helpim ol sumatin long wokim risets bilong ol, wokim ol asainmen bilong ol na ol stadi long redi long ol bikpela tes bai kamap na tu long lainim samting long olgeta de.

"Em i namba wan kain samting i kamap long ol dispela skul na ol papamama wantaim ol tisa na sumatin i amamas tru

long dispela.

"Samting olsem 700 sumatin i bin kamap na sanap long draipela san long lukim dispela samting i kamap na ol i amamas tru na smail," Mista Waiu i tok.

Memba Joseph Yopyyopy i tok olsem em i amamas long Gavman i wok bung wantaim Digicel na Wosera Gawi Distrik long bringim dispela program.

Em i tok em i amamas long lukim ol sumatin na tisa i gat infomesen long internet we em yet i no bin gat, taim em i bin stap long skul.

DBTI opisa kisim Nesanel Setifiket IV

DON Bosco Teknikel Institut (DBTI) i bin givim wanpela Nesanel Setifiket IV trening na As-esmen woksop inap long 6-pela de.

DBTI i save sapotim Visen 2050 bilong kantri olsem na ol i save givim profesenel developmen trening long ol opisa bilong ol. Stat long Ogas 29 i go pinis long Septemba 31, Joe Lokes, Tim Lida bilong Monitaring, Ivaluesen na Risets Brens long Nesanel Trening Kaunsil (NTC) insait long Laura Vicuña haus long DBTI Taurama Rot.

Dispela i bihainim namba wan pila o pos bilong PNG Visen 2050 we i toktok long Human Kepitel Developmen, Jenda, Yut na Pipel Empawamen olsem i stap insait long 1975 PNG Konstitusen.

"Trening bilong ol wokman na wokmeri long lainim disain na developmen em i namba wan tingting bilong dispela



Ol DBTI opisa husat i bin kisim NTC trening.

woksop. Em i bihainim ol wei bilong NTC polisi na rejestresen," Mista Lokes i tok.

Ol opisa husat i bin stap long dispela trening em: Fredrick Onaput, Man i go pas long Teknoloji; Noel Guillermo, Risets na Karikulum Developmen Opisa; Jojo Siriban, Kompiuta Teknoloji Instrukta; Erwin Napiza, Eria Het ov Ilektrikel na

Ilektroniks Teknoloji; Ferds Raymundo, IT Menesa; Julius Pagaurea, Mentenens Fiting na Masining Teknoloji Instrukta na Wilmer Dumaya, Moto Vehicle Teknoloji Instrukta.

"Trening i bin hevi stret tasol em i inapim tru nid bilong ol opisa. Em bai helpim institut long bringim ol nupela teknoloji program na ol sot kos


long ol kain kain teknoloji long bihainim taim," Guillermo i tok.

"Em i helpim mipela long save long teknikel standet insait long PNG," Raymundo i tok.

"Mi laki long kisim dispela trening na nau mi gat save long kamapim wanpela trening program. Dispela trening i opim tingting na save bilong mi long developim ol rait asesmen bilong kain kain kompetensi o save long givim ol sumatin bilong mi," Pagaurea i tok.

Ol arapela teknikel instrakta na ol trena bai kisim Nesanel Setifiket III long Trening na As-esmen long mun Novemba long dispela yia.

DBTI edministresen i bin putim mani long sapotim dispela program long apgredim institusen.



Salim Graun o Nogat?

NAU long dispela taim ol papa na mama bilong graun i bungim planti salens.

Developmen i kam na i laikim graun na ol papa na mama graun i save driman i stap. Bihain ol i save kirap nogut olsem graun bilong ol i stap aninit long wanpela lis. Planti papa na mama graun i no save gat plen bilong graun bilong ol. Ol i save graun i stap na ol i yusim tasol na ol i no tingting moa.

Long taim bilong tumbuna ol i luksave olsem graun i save givim olgeta samting ol i nidim olsem na ol i save pren gut tru wantaim graun.

Taim ol i laik mekim gaden ol i save toktok wantaim graun na taim gaden i redi na taim ol i kisim namba wan kaikai ol i save mekim kaikai bilong tok tenkyu.

Nau long dispela taim sindaun i no wankain olsem taim bilong ol tumbuna. Nau planti yumi i hangamap long kago bilong stua na ol kago ol i mekim long narapela ples. Yumi lukim sindaun bilong ol pipel bilong ol arapela kantri na yumi aigris. Dispela i givim tingting long yumi olsem ol samting i kam long graun bilong yumi yet i rabis.

Olsem na sampela bilong yumi i save laik salim graun hariap tru.

Yumi lus tingting olsem graun em i no olsem yam o taro o rais na tinpis we yumi ken yusim nau na tumora bai yumi go kisim nupela. Yumi lus tingting olsem graun em i no samting bilong wanpela man tasol.

Taim wanpela man i longlong na salim graun olgeta pipel insait long klen i save pilim pen.

Bikpela hevi tru i save kam taim dispela man i luksave na i laik kisim graun bek. Em i taitim em yet pinis taim em i putim hanmak bilong em long hap pepa. Planti taim em i no save holim kopi bilong dispela hap pepa.

Em bai i sotwin raun long painim helpim na olgeta rot em i bihainim i save salim em i go long lukim loya. Nau em bai tuhat nogut tru bikos loya bai i sasim em bikpela mani. Na taim em i no gat mani, loya bai i no inap mekim wok na narapela man ya i go het nau long mekim wok antap long graun bilong em.

Planti papa na mama graun i save traim long kisim graun bek tasol hat nau ol i save go bek na wok olsem sekyuriti o klina o draiva long man i kisim graun bilong ol. Ol i no inap moa long mekim gaden long dispela graun o go kisim pis long wara insait long dispela hap. Sindaun bilong ol i senis na ol pikinini i stat long pilim pen nau.

Graun em i no stap em yet. Em i pas tru wantaim yumi ol pipel. Olsem na yumi ken luksave taim yumi no rispekim na lukautim graun gut, yumi tu save pilim pen. Yumi mas tingting gut! Salim graun o maski larim em i stap fri na yumi tu bai stap fri.

Maru: Mani bilong SME go we?

MINISTA bilong Tred, Komes na Industri, Richard Maru, i askim ol Memba bilong Palamen (MP) long tokaut stret long wanem samting ol i mekim long K1 milien ol i kisim long fandim ol liklik bisnis o SME.

Mista Maru i tok dispela K1 milien i stap insait long distrik sevis impruvmen program (DSIP) mani ol MP i save kisim long olgeta yia, na as bilong dispela K1 milien em long helpim ol liklik bisnis insait long distrik bilong ol i kisim helpim long statim nupela bisnis.



Minista bilong Tred, Komes na Industri, Richard Maru

Em i tok insait long K10 milien ol wan wan MP i save kisim long wan wan

yia, K1 milien em spesel mani i stap insait long dispela K10 milien na em mas go long helpim ol liklik bisnis i gro.

Em i autim dispela toktok long las wik long Jiwaka taim em i lonsim maikro fainens kredit skim bilong kisim dinau mani we Memba bilong Angilimp-Saut Waghi, Joe Koim, i ranim long helpim ol pipel bilong em long statim bisnis.

“Planti ol MP i no sapotim ol manmeri bilong ol long mekim bisnis. Ol i no yusim gut dispela mani

long helpim ol manmeri long distrik bilong ol long statim nupela liklik bisnis,” Mista Maru i tok.

Mista Maru i tok Gavman i plen long kirapim 450, 000 bisnis manmeri long kantri na dispela namba wan rot long mekim dispela em tru long SME o liklik bisnis.

“Mi amamas olsem Memba bilong Angilimp-Saut Waghi tasol i luksave long gutpela bilong statim liklik bisnis.

“Mi no ting ol arapela memba i mekim dispela kain samting long helpim ol pipel i statim bisnis,” Mista Maru i tok.

YPOMCCI holim bung long strongim netwok

OL yangpela manmeri husat i gat strongpela tingting na bikpela laik long mekim bisnis i wok long bung aninit long Young Port Moresby Chamber of Commerce na Industry (YPOMCCI).

Presiden bilong dispela grup, Chris Elphick, i tok as bilong kamapim dispela grup em long hepim ol yangpela manmeri long Pot Mosbi i kamap bisnis lida na kampani menasa long bihain taim.

Long las wik Fonde, ol yangpela manmeri long bisnis sekta long Pot Mosbi i bin bung. Ela Motors i bin sponsaim dispela bung.

Mista Elphick i tok as bilong dispela bung long las wik Fonde em long kamapim netwok na strongim poroman namel long ol memba bilong dispela yangpela grup bilong bisnis lida na menasa.

“Dispela Young Chamber em i wanpela sab-komiti bilong POMCCI. Em i save givim ol trening na skul toktok na lukluk long kamapim ol nupela na yangpela jeneresen bilong bisnis menasa na lida long Pot Mosbi,” Mista Elphick i tok.

Mista Elphick i tok namba

bilong ol nupela yangpela memba bilong dispela samba i wok long gro na planti yangpela manmeri i wok long joinim dispela grup.

“Ol i save olsem ol bai kisim bikpela benefit. Semba bai helpim ol long kamap gutpela lida long bisnis. Mi amamas long lukim planti manmeri i joinim dispela grup,” em i tok.

YPOMCCI i save lukluk long 6-pela eria:

- Networking na pesenel developmen;
- Ikonmik na bisnis development;
- Edukesen na wokfos developmen;
- Koporet gavanens;
- Komyuniti rilesens; na Sosel welfea.

Ol manmeri husat i go pas long Young Chamber em ol: Presiden Materua Tamarua (bilong SP Brewery), Seketeri Lesieli Taviri (bilong Origin Energy) na Tresera Nellie Tetaga (bilong InterOil).

Oil Search makim nupela dairekta

BIKNEM oil na ges kampani bilong PNG, Oil Search, i makim Mel Togolo i kamap wanpela nupela dairekta bilong kampani.

Mista Togolo em i kantri menasa bilong Nautilus Minerals na em i wanpela senia bisnis lida long PNG.

Em i gat ekspirens long menesim bisnis long PNG, Australia na Solomon Islands.

Mista Togolo em i wanpela bilong ol bikman i kirapim PNG Business Council na em i holim arapela



Mel Togolo...nupela dairekta

bikpela wok olsem dairekta long sampela bikpela kampani long PNG.

Mista Togolo i gat planti yia ekspirens long wok bi-



Bart Philemon...lusim wok

long gavman na kampani wantaim.

Siaman bilong Oil Search, Rick Lee, i tok Mista Togolo bai kisim ples bilong Bart

Philemon, husat i risain olsem dairekta bilong Oil Search.

Taim Mista Philemon i bin lusim sia bilong Memba bilong Lae long 2012 nesenel ileksen, Oil Search i bin makim em i kamap dairekta.

Long bipo long yai 1992, Mista Philemon i bin stap dairekta bilong Oil Search.

Mista Lee i tok tenkyu long wok Mista Philemon i bin mekim stat long yia Novemba 2012 taim ol i bin makim em dairekta bilong Oil Search.

ExxonMobil na Oil Search baim ofso laisens

Bikpela oil na ges kampani bilong Amerika, ExxonMobil na biknem oil na ges kampani bilong PNG, Oil Search, i baim tupela ofso laisens long solwara.

ExxonMobil na Oil Search i baim tupela ofso petroleum prospekting laisens (PPL) long solwara bilong Gulf of Papua we Gini Energy bilong Saina i bin holim.

Ofso PPL em i laisens bilong

painim oil na ges long solwara, i no long graun. Ol kampani bilong painim oil na ges o ol eksploresen kampani i save kisim dispela laisens long Dipatmen ov Petroleum na Eneji.

Gini Energy i salim 40 pesen bilong ofso laisens PPL 373 na PPL 375 i go long ExxonMobil na Oil Search.

Mama kampani bilong Gini En-

ergy em i CHOOC bilong Saina, na Gini Energy yet bai holim 20 pesen.

ExxonMobil bai kamap opereta bilong dispela laisens. Dispela PPL laisens eria i stap 150 kilomita saut long Pot Mosbi na em i stap long solwara i dip no gut tru.

Sais o bikpela bilong dispela tupela laisens eria em i 24,936 skwaia kilomita na dip bilong solwara em i stap namel long 1000-2500 mita.

Taim ol dispela tripela kampani i pinisim dispela fam-in agrimen we Gini Energy bai wanbel long salim aut 80 pesen raits o onasip i go aut long Oil Search na ExxonMobil, Gavman bilong PNG aninit long Dipatmen ov Petroleum na Eneji bai mekim laspela disisen aninit long lo.

ExxonMobil em i opereta bilong PNG LNG Projek join vensa we Oil Search, Santos, Kumul Petroleum

Holdings, JX Nippon Oil and Gas Exploration, Mineral Resources Development Company, na Petromin PNG i patna long en.

PNG LNG Projek em i wanpela bikpela ges projek we i gat bikpela ges prodaksen na prosesing fasiliti i kamap long Hela, Sauten Hailans na Westen Provins na salim ges i kam long Sentral Provins.

Buy Your Air Niugini Ticket Anywhere, Anytime Using BSP Mobile Banking.

DIAL *277# TO PAY

Reminders:

- > Must be a registered BSP Mobile Banking customer.
- > Obtain a booking reference with Air Niugini prior to making a phone banking payment.
- > Use your e-ticket details to Check-in at the airport or online via www.airniugini.com.pg
- > Available to Digicel and bmobile-vodafone subscribers. Mobile service charges apply.
- > Fare conditions apply.

Air Niugini www.airniugini.com.pg

Travel Purchase Queries: 180 3444
ehelpdesk@airniugini.com.pg

Mobile Banking Registration: 320 1212 / 7030 1212
servicebsp@bsp.com.pg www.bsp.com.pg

Goroka So 2016 pulim planti turis

Loutova Siapea i raitim

OL lokal na intenesenel turis i kapsait i go nau long lukim bikpela Goroka na Isten Hailans so we bai kamap long dispela Independens wiken.

Ol ripot Wantok Nius i kisim long dispela wik i soim olsem ol hotel, motel, ges haus na ol arapela haus

slip em i pulap tru, tasol moa turis i wok long i kam yet.

Siameri bilong Goroka So Sosaiti Karen Hargrivs i tok, dispela namba 52 so bai i kamap narakain liklik long ol arapela so, long wanem moa long wan handet singsing grup husat bai i kam yet long olgeta 23 provins long kantri i putim nem pinis long singsing

long dispela so.

“Dispela tripela de so we bai stat long independens de long dispela Fraide i pulim pinis planti turis bilong ol bikpela ovasis kauntri olsem Swisalen, Japan, Saina, Australia, Ingran, Amerika, Nu Silan, Midel Is na ol arapela kantri tu.

“Na mipela i amamas tu olsem planti ol bikpela kampani tu husat

i save patna wantaim mipela long putim so olsem Ramu Egri Limited o Ramu Suga, Ela Motors, Cocoa Cola Amatil, SP Brewery, Rais Indastri na ol arapela bisnis haus tu husat bai kamap na putim ol samt-ing ol i save kamapim long en”, Hargrivs i tok.

Long sait bilong empi tieta, king bilong Tolai rok, Leonard Kania bai

i go pas long kirapim das wantaim ol lokal hit song bilong em olsem, ‘Meri masalai’ na ol arapela moa.

Ol ogenaisa i bilip olsem moa long 200,000 pipel bai kamap long lukim dispela 3-pela de so. So bai stat long Fraide 16 Septemba na bai pinis long Sande 18 Septemba.

US Embesi skelim save bilong ol PNG jenelis

Frieda Sila Kana i raitim

YUNAITET Stets (US) Embesi long Papua Niugini i wok long holim ol sotpela trening bilong ol PNG media long wei bilong kisim nius bilong ranim ol politik long kantri, insait long Pot Mosbi Laibreri, Ameriken Kona.

Long wik Fonde, namba tu bos bilong US Embesi long kantri, Deputi Sif ov Misin, Joel Maybury i bin i bin kirapim tingting bilong ol nius ripota na ol pablik long wanem kain wei bilong kisim na raitim nius bilong politik long kantri.

Em i kirapim tingting wantaim ol tok piksa na liklik pilai we em i holim tripela piksa pres konpres we sampela nius ripota na sampela pablik nating i bin go long fran na holim giaman konpres we em i larim ol nius ripota i askim kwesten na em i bekim.

Long dispela kain we em i painim aut tingting na skelim bilong ol pablik long ol wei bilong ol nius ripota bilong PNG i save kisim nius na ranim long pablik i lukim na ritim na harim long ol kenidet i ran long politik. Long dispela taim US em i wok long holim kempein bilong narapela Presiden bilong Amerika na ileksen bai kamap long mun Novemba.

Insait long ol toktok bilong em, Mista Maybury i kamapim ol

tingting olsem wanem wok bilong media long kantri.

“Yupela ting ol nius ripota bai stap olsem ol referi? O yupela ting olsem media i mas mekim wok bilong en olsem namel man bilong kirapim ol tok pait o dibeit long ol bikpela toktok bilong kantri?” Mista Maybury i tok.

Wankain olsem sampela bilong ol pablik insait long dispela bung, Mista Maybury i tok em i ting olsem ol nius ripota bilong kantri i save mekim gutpela wok tasol em i tok i no planti taim ol media i save kamapim ol toktok bilong painim tingting bilong ol pipel long ol politik na ol politisen olsem long Amerika na Australia we ol media i save ranim ol opinien pol long kisim tingting bilong pablik.

Em i larim ol pablik i mekim toktok long ol jenelis husat i makim olgeta nius ripota long taim ol i holim giaman konpres, bikos em i tok, ol sitisen i mas sekim wok bilong ol media long ol i no ken wokim wansait wok tasol.

Ol dispela bung em bilong bringim aut stori bilong US Presiden resis namel long Seneta Hilary Clinton wantaim bikpela bisni man, Donald Trump.

Bai i gat sampela moa kain bung olsem i kamap pastaim long Novemba ileksen bilong Amerika bai kamap.



Ol Katolik TVET sumating.

Ol Katolik TVET skul stap long mak bilong pas

Sr Mary McCarthy i raitim

BOD bilong menesmen bilong ol Katolik TVET (teknikel vokesenel edukesen trening) i redi long mekim disisen long pasim ol skul.

Ol i askim Edukesen Dipatmen long baim ol Tem 3 tiusen fi fri (TFF) subsidi we Dipatmen I no baim yet.

Sapos no gat, ol bod memba i tok ol i nogat rot bilong ranim ol skul tasol bai pasim.

I gat moa long 50 Katolik TVET skul long kantri.

Ol i tok Katolik sios i bung wantaim Edukesen Dipatmen long ronim dispela ol skul tupela wantaim i mas wok hat long ranim dispela ol

skul.

Planti bilong dispela ol skul i stap long bus, longwe long ol taun na kain hevi long TFF i no kamap o i kisim longpela taim long go i save givim bikpela hevi long ol.

Ol bod i tok: Independens De i givim taim long yumi long skelim dispela tok long Mama Lo bilong kantri we i tok long yumi soim rispek long ol tumbuna bilong yumi husat em yumi lukim na kisim strong long ol.

Long dispela as ol lain husat i go pas long yumi long Katolik edukesen, yumi ken tok histori bilong en i stap longtaim liklik, inap olsem 140 yia.

Stap bilong Katolik edukesen, stat long taim bilong Independens, i

kamap bihain hatwok bilong ol tisa em planti bilong i go long ples long bus tru long givim taim na sevis i go long ol manmeri bilong yumi.

Long hatwok na strong bilong dispela ol tisa, yumi i ken tok edukesen long kantri i kamap strong.

Ol Katolik TVET (Teknikel Vokesenal Edukesen Trening) tisa i namel long ol lain opisa husat i givim taim na sevis long ol pikinini bilong yumi.

Long dispela yia Novemba, 2016, menesa bilong dispela ol trening skul bai bung na kisim sampela trening.

Ol bai kisim trening long kamapim wok bilong Visen 2050 long

lukim wok bilong TVET i kamap tru.

Dispela trening em Dipatmen bilong Foren Afeas na Treid bilong Australia i sponsa long en.

Wok bilong TVET i kamap long St Joseph’s long Lae, Morobe i kamap long nius na olsem manmeri i save pinis.

Tasol ol skul olsem St Joseph’s Kikori, Galp na St Joseph’s Wataluma, Milne Be; St Paul’s Tumuru, Atonomus Rijn bilong Bogenvil em hat wok bilong ol em no gat nius long ol na olsem ol manmeri i no save gut.

Nau yet bikpela hevi dispela ol skul i bungim em long Tem 3 tiusen fi fri (TFF) subsidi we Gavman i no baim yet.

Happy 41st Independence Day Papua New Guinea!

RD Tuna Canners Ltd.
Better. Life. Ahead.

Mining bilong Independens

piling long 16 Septemba, 1975

Paul Zuvani i raitim

WAN WAN man i gat filing bilong ol long taim Papua Niugini i kisim Independens long 1975.

Dispela raita i wankain na em i filing amamas na sori wantaim. Amamas bikos Independens i bringim fridom, fridom long mi mekim disisen long stap long laip bilong mi.

Sori bikos planti guds na sevis we i bin isi long kisim i kamap hat.

Mi mekim Gret 1 (wan) long Mikarew Praimeri Skul, Bogia, Madang provins taim kantri i kisim Independens long 1975.

Tasol pastaim long dispela mipela lukim nupela mani, Kina na Toea i kamap. Australia dola na siling em ol kaunsil na stua manmeri i tokim mipela long rausim na senisim wantaim Kina na Toea.

Mi no save gut long mining bilong Independens long dispela taim tasol papa bilong mi I tok em taim ol waitman bai go bek long ples bilong ol na yumi bai lukautim yumi yet.

Tasol mi no save dispela tok papa bilong mi i mekim bai gat bikipela mining long mi long bihain taim.

Wik bipo long Septemba 16, 1975 ol tisa i tokim mipela long klinim skul na ples long amamasim dispela de.

Na taim de i kamap, ol tisa i mekim mipela i sanap long lain na mekim mipela i mas long samting olsem 2 kilomita longwe i go long stesin long ples bilong bung.

Mipela i lainim nesenel antem long singim long dispela de long kantri bilong mipela.

Long sait bilong pilai ol bikipela manmeri long ples tu i bung na ol i pilai volibal, soka, resis long selim drai kokonas, skrapim drai kokonas, katim diwai, kuk, kaikai plawa bol i hangamap, resis long painim tresia ol i haitim, grisi pol,



Ted Diro Elementeri Skul Independens selebresen, Pot Mosbi.

kros kantri na planti moa ol arapela pilai.

Ol tisa, kaunsil na pater i givim tok long amamasim dispela de.

I bin gat ol gutpela samting i kamap tasol mi no bin save olsem dispela ol amamas i amamas tasol.

Bihain mi save olsem long stap gut na amamas long laip, ol disisen mipela i mekim i bikipela samting.

I no longtaim mi lukim ol samting i stat long bruk daun. Gavman i no moa stretim rot long wan wan yia olsem em i save mekim long taim bilong Australia.

Ol rot we ka i save ran isi long go kam i stat long gat bus na ol baret i kamap long rot.

Ol lidaman ol manmeri i votim i no save go stap raun wantaim ol manmeri long ples long save long hevi bilong ol na stretim. Ol i stap tasol long Pot Mosbi.

Dispela i wankain long ol opisa bilong Gavman. Ol i no go long ples na stap wantaim ol manmeri long save long hevi bilong ol.

Long tingim bek toktok bilong papa bilong mi, mi filing olsem taim Australia go, em i kisim wantaim em gutpela spirit bilong kamapim gut ol samting na sindaun gut.

Mi filing olsem mipela i ken tok mipela i stap independen tasol i nogat wanpela gutpela samting i

stap long soim olsem mipela inap sanap long lek bilong mipela yet na mekim ol disisen we inap long kamapim gutpela sindaun bilong yumi olgeta.

Mi ting mipela i kisim Independens hariap tumas.

Sapos mipela i tok mipela i kisim Independens tasol pasin bilong mipela i bagarapim sindaun bilong mipela, mipela i no fri yet. Mipela i fri long sait bilong politik na save tasol.

Stap independen long politik na save em i gutpela, nogat asua. Planti taim hevi i kamap long Gavman olsem long taim bilong Sandline "Crisis" na ol narapela kantri i

ting mipela bai bagarap tasol mipela i no kamap olsem ol i ting long en.

Ol manmeri bilong mipela i kisim save long kainkain samting na i ken mekim na mipela i kamapim kainkain projek olsem PNG LNG.

Tasol rot bilong lukautim mani na lukautim ol pablik samting i gat hevi yet. Dispela em mipela i mas stretim.

Mipela i mas strongim tingting bilong lukautim mani na lukautim pablik samting gut, ating taim mipela i mekim olsem mining bilong Independens bai kamap ples klia.

PAPUA NEW GUINEA CELEBRATING 41 YEARS

WE ARE BSP

We have knowledge, history, experience and a commitment to PNG like no other financial institution.

We share a common bond - our culture, our community, our people. Knowing that united we will be successful. Wherever you live, we know you, and we are there for you. After all PNG is our home – We are PNG, We are you.

BSP

www.bsp.com.pg

POP i gat nupela mausman nau long PNG na Solomon Ailan



Ol Salesien Famili i tok welkam long nupela Apostolik Nunsio o mausman bilong Pop long PNG na Solomon Ailan, Asbisop Kurian Mathew Vayalunkal husat i kamap long PNG long statim wok bilong em. *Poto na stori: Pater Ambrose Pereiras sbd*

ASBISOP Kurian Mathew Vayalunkal, i bin kamap long PNG long las wik .

Ol Salesien famili long Don Bosco long Pot Mosbi i bin

holim wanpela bung long Emmaus Konpres Senta long tok welkam long en.


PGS provinsal Pater Peter Baquero sdb, i tok welkam long makim Salesien famili, ol

Salesien Sister na ol Caritas Sister.

Nupela Asbisop i bin tok taim em i wok long Cairo, em i harim sampela stori long PNG, tasol nau em i kam pinis

long PNG long stap na wok hia.

Ol Salesien famili i bin givim em sampela presen long tok welkam long en.



Disebel pasto, Pasto Sailas.
Poto: Paulus Tali

Paulus Tali i raitim

WANPELA Pasto bilong Evanjelikal Luteran Sios long Hagen Distrik i mekim wok bilong autim Gutnius, maski em i disebel. Pasto Sailas Koperui em dispela man na em i bilong liklik ples Pamboi long Aika wanpisan long Hagen Distrik. Maski lem i gat hevi long lek, em i

wokabout wantaim stik i mekim wok bilong autim Gutnius long 6-pela yia nau. Ol dokta long Maun Hagen Haus sik i bin katim lek bilong em, tasol Pasto Sailas i no surik long mekim wokbilong autim tok. Taim em i pinisim praimer na haikul, em i bin kamap

Sande skul tisa. Long yia 2003, em i bin aplai long Hailans Luteran Semineri long Orgelbeng long Hagen na kamap pasto. Bihain gen em i kisim skul long wok edministresen long Banz Luteran Kolis na kisim setifiket long 2010. Pasta Sailas i no stop gen, em i go het na lai long kamap praimer skul tisa long Balob

Tisa Kolis long Lae. Em i bin kisim diploma long kamap praimer skul tisa. Nau em i wokabout wantaim stik na skruim wok i stap long ELC Hagen Distrik long autim Tok bilong Bikpela, mekim wok olsem Rilijes skul instraksa na tu, lukautim klostu 500 k o n g r i g e s e n memba bilong Pulumong.

BSP sapatim Ret Sil Apil

SALVESEN Ami Sios i ken skruim i go moa wok bilong em long kantri. Ol i tok tenkyu i go long Benk Saut Pasifik (BSP) husat i givim K20,000 donesen long las wik i go long Salvesen Ami. BSP i bin givim dispela donesen long sapatim Salvesen Ami long Red Shield Apil program bilong em. Benk i luksave na sapatim dispela program bikos em i mekim wok long givim helpim i go long komyuniti. Grup Genel Menesa bilong Riteil Benking, Paul Thornton i tok, "Mipela i luksave long pipel na komyuniti em tupela veliu bilong benk na Salvesen Ami tu i serim dispela. "Mipela i luksave long ol kain wok na mipela i sapatim ol ogenaissen husat i serim ol wankain visen long kamapim ol senis insait long ol komyuniti," Mista Thornton i tok. Teritorial Komanda bilong Salvesen Sami long PNG, Andrew Westrupp, i bin tok tenkyu i go long BSP long sapatim Red Shield Apil na tok helpim we BSP i givim bai helpim ol long ol komyuniti developmen, helt na haijin, edukesen, welfe na disasta rilif o ol lain i kisim bagarap long ol hevi i save kamap long ol neturel disasta olsem guria, graun i bruik, bikpela ren na taitwara na ol kain hevi moa olsem. Red Sheild Apil program i stap moa long 30 krismas bihain long ol i bin kirapim long ol yia long 1980.

SAVE na MEKIM

Sapta 2 ...moa yet long hap 1 Taro (Taro tru)

Tok i go pas
LONG sampela hap bilong Papua Niugini, taro em i namba wan kaikai bilong ol, long taim bilong tumbuna. Olsem na long sampela tok ples, nem bilong taro em i olsem "kaikai." Nau long dispela taim, wok bilong planim taro i laik i go slek liklik. Tasol i no slek tumas. Taro i stap yet namba wan kaikai long nambis na long maunten tu, sapos maunten i no antap tumas.

Tok bilong skelim kaikai
Sapos yu planim wanpela gaden taro na wanpela gaden kaukau, na sapos tupela gaden i wankain, bai kaikai long gaden kaukau u planti winim kaikai long gaden taro. Na tu, kaukau bai i redi kwik, na taro bai i stap 7-pela o 9-pela mun pastaim na i redi.

Tasol long tingting bilong planti manmeri, swit bilong taro i winim swit bilong kaukau. Tok bilong planim Planim long mun bilong em stret, bai em i kamap gut tru. Planim nabaut, bai em i kamap i orait liklik. Sapos yu no save long mun bilong planim taro, orait, askim tumbuna o papa mama bilong yu.


Tok bilong sik na binatang
Wanpela sik i save painim save taro na i mekim lip bilong em i kamap retpela, na kaikai bai i sting. Long narapela sik, bai lip i krungut na i pas pas. Long daunim dispela tupela sik, yu ken traim rot olsem:

1. Kisim stik bilong kain taro i no save painim dispela sik.
2. No ken miksim stik bilong nupela na olupela gaden na planim.
3. Planim long nupela hap graun
4. No ken planim taro tasol. Planim sampela arapela kaikai namel long ol taro.

Wanpela binatang ol i kolim binatang bilong taro o taro bitil, em i save bagarapim kaikai bilong taro.

Sampela man bilong ples ol i save mekim wok long daunim dispela binatang olsem: Kukim bus, klinim graun gut, na rausim olgeta lip samting, antap long graun. Long sampela hap ol i save mekim olsem: Brukim graun go liklik liklik na rausim olgeta pipia rop diwai, na rop kunai samting, na planim stik taro long klinpela graun tasol.

Sampela didiman ol i putim marasin bilong stopim binatang. Rot bilong dispela i olsem: i gat wanpela marasin ol i kolim 6% Lindane Granules. Em i luk olsem blakpela wesana. Kisim liklik long dispela marasin na putim long hul taim yu planim stik taro.



Alotau lonsim Demogrefik Helt sevei

DEMOGRAPIK helt sevei trening bilong Milne Be provins em Sharon Mua, Deputi Etministreta Kopret Sevis i lonsim long Masurina Lods long 12 Septemba, 2016.

Dispela lonsing em Sif Eksekutiv Opisa bilong Milen Be Provinsel Hospitel, Billy Naidi, Provinsel Edvaisa, Stanley Antonio na mausman bilong Nesenel Statistikel Opisa long Sauten rijon, Raphael Sari i bin stap long en.

Dispela lonsing i bilong statim tupela wik trening bilong ol opisa bipo long ol i karimaut sevei long ol provins.

Dispela sevei bai go inap long tripela mun na bai karamapim 36 ples na insait long dispela 24 famili o haus bai ol opisa i toktok wantaim ol.

Ol opisa bai mekim sevei namel long ol lain husat i gat 15 krismas i go long 49 krismas.

Milne Be provins bai gat tupela tim we i karamapim 36 ples long olgeta distrik

long provins.

As tingting bilong kamapim dispela sevei em long kisim ol ripot o toktok olsem nupela bebi, sapos ol i stap o dai, we ol i laikim ol pikinini man o pikinini meri, sapos papamama i kisim ol pikinini klostu o i spesim, sapos ol manmeri i save kisim helt sevis gut, kamap bilong HIV/AIDS, samting ol famili i save laikim na sapos ol i gat rot bilong banisim kamap bilong sik malaria.

Dispela ripot em Helt Dipatmen, Nesenel AIDS Kaunsil na Plening na Monitaring Dipatmen bai yusim.

Dispela ripot em long skelim wok bilong Gavman insait long Milenium Tem Dvelopmen Gol, Nesenel Populesen Polisi 2015 i go long 2024 toktok, Sasteni-bel Dvelopmen Gol na Nesenel Helt Plen.

Long ol pastaim yia, kain toktok i no save go long ol provinsel gavman tasol dispela pasin nau i senis na ol provinsel gavman tu i kisim kain ripot o toktok.



Ol bikman long lons bilong Demogrefik Helt Sevei long Masuarin Loj long Alotau, Milen Be provins.



ANZ CONGRATULATES
PAPUA NEW GUINEA
ON ITS 41ST
INDEPENDENCE DAY CELEBRATIONS

REINFORCING OUR OPTIMISM AND COMMITMENT TO THE COUNTRY

When it comes to taking advantage of opportunities around the region, connections count. We offer customers capabilities and connections across the Asia Pacific region including Australia and New Zealand, supported by one of the world's strongest, safest banks. And with a network like that, we're able to connect you to the right people, the right products and the right insights.

Talk to us today about your banking needs.

+675 321 1079



Toro

Long Independens de stret Toro kirap long traipela 4kilok moning na go long ples balus..Em laik spendim Independens bilong em long ples...



Em go long kaunta bilong PNG Air na givim tiket...



Toro em paol olgeta na em belhat tru..



Toro em westim taim stret..Hat long go bek long haus..Em karim ol kago bilong em na go silip long as bilong marmar igo apinun 4kilok na em go long ples..



Biabia

Long Independens de stret Biabia i sanap wantaim ol digniteri long lukim independens fleg i go antap.



Bihain long Praim minista i toktok, ol i apim fleg... Biabia em wari tru...



Ol soldia i parapim gan na liklik aiwara bilong Biabia kamdaun...



Nau wanpela soldia i pleim musik bilong nesenel entem na i mekim Biabia i wari nogut tru...



Taim olgeta manmeri i laik singsing na bihainim musik man, Biabia em eksploud.



Kanage

Long Independens de, Kanage em spak nogut tru.. Em wokabaut long rot singaut nating nating long rot...



Long hap rot, pispis i kilim Kanage...



Nau em painim ples bilong pispis..



Em go sanap arere long pawa pos na pispis.. Long seim taim ol polis i tanim kona long rot na ol i spotim Kanage...



Ol i kam stop klostu long Kanage na wanpela bilong i singaut long Kanage...



Teks i kam long 71845906

Dia Edita, mipela pipel bilong Poroma laikim haikul bipo gavana kam i go long neks ileksen 2017.

Tenkyu, William Powi

Dia Wantok Nius, mipela mangi long ples Sandaun i save painim hat long ol stail tokples raiting bilong Esien kantri. Planti samting long stua ol pipel i baim ol i save painim hat nogut tru long openim na yusim o harim. Bilong wanem? Nem bilong ol samting pipel paul long ritim na save. Ol kaikai, sofdring, marasin bilong sik na moa samting long stua bilong Vanimo taun. Ol ples kanaka insait long bik bus i no inap onim radio na harim nius bilong provins na kantri i gat wanem kain hevi, pipel i no save kisim nius tasol ol i stap longlong. Na tu loging kampani wok long bagarapim wara na pulim krosim wara o pulim diwai go kam insait long wara i no stret. Trensit bilong stokim diwai o hipim olgeta diwai arere long bikpela wara we planti ples i stap long dispela wara na sik wok long kamap olsem, bel solap, skin sikirap na ai i smok no moa lukluk gut. Loging beskem ol man long narapela hap kisim enemi bebi enimal tiger wantaim snek kobra kam insait.

Mangki Sandaun


Tenkyu tru Edita Wantok Niuspepa. Nem bilong mi Peter Takis na mi bilong Hagen, W.H.P. Mi lus kontek wantaim dispela Belgian Voluntia nem bilong em Mista Guy Joris. Mi bin wok wantaim em long taim em stap long Gerehu long Pot Mosbi, NCD. Tenkyu tru Wantok Niuspepa

Sapos wanpela man o meri i save long Mista Guy Joris, plis ringim em na tok save long em olsem pren bilong em Peter i painim em na i ken ring long dispela namba 7954 5720.

Peter Takis



Selebretim 41 yia Independens Anivesari wantaim hamamas. Wantaim femili bilong yu. Papa God i stap wantaim yu long dispela bikpela de bilong yumi. Hepi 41 Independens anivesari Papua Niugini!!



**GLASIM
TOK
wantaim**
Fr Lollington Wiam

Independens mesis

PNG nau laik selebretim nara-pela kalaful yia bilong makim 41 bon de bilong kantri i kisim independens. Dispela amamas em bilong tingim holsem wanem yumi i stap aninit long koloniel masta pawa na husat lain i wok hat tru long kamapim independens na nau yumi i stap fri... Tru, yumi mas tok tenkyu long Australia husat i kamap koloniel masta tasol i no bin givim pen o bulim yumi long dispela independens bilong yumi PNG. Tru, tumas, independens em i blut i mas kapsait pastaim bihain gutpela sindaun i save kamap, tasol, yumi PNG em spesel blesing bilong Papa God olsem na yumi i no bin bungim hevi taim yumi kisim independens. Yumi mas tok tenkyu tu long Gren Sif Sir Michael Somare, Sir Julius Chan, Sir Pita Lus, presiden John Momis na planti husat i hat wok tru long sapotim na kamapim dispela in-

dipendens. Spesel tenkyu i go long kantri Fainest Pati, "PANGU" Papua na Niugini bung wantaim.

Dispela em gol yumi olgeta PNG sitisen i mas wok hat long winim. Tasol dispela pasin wok bung i no moa i stap. Yumi lukim wanem samting i wok long kamap long PNG. Wantok sistem, stil pasin, rijinolisim, braiberi, les pasin, yu no wok tasol yu kisim pe yet. Yu no gat save tasol pasin bilong masta mani beg yu gat spes pinis long ol bikipela skul, yu no gat wok na yu wanpela man nating man, tasol pasin bilong giaman nem long pe rol yu gat mani yet.

Planti kain kain pasin i no stret moa i wok long kamap na bai yumi stretim olsem wanem. Tru 41 krismas PNG i gat bikipela senis. Dispela senis em long top daun plening.

Stat long Pot Mosbi siti na i go daun, tasol i no wokaut gut na

developmen i stat long siti tasol. I gutpela yumi stat long daun-bilo ap plening. Stat long distrik na kam antap. Mi ting dispela rot bai yumi inap inapim wod PANGU. Papua Niugini Yunaitet. Wok bung na kirapim gutpela wok. Em olpela pati bilong Se Michael Somare.

Dispela em salens bilong Somare famili. Ol i mas kam aut na tok tenkyu long pati em i givim raits long ol long gutpela sindaun. Em namba wan. Namba tu, mi laik askim PNG, ol husat lain tru i loim flag bilong Australia na daunim plak bilong yumi PNG. Husat lain tru selebretim tru independens na lukim namba wan praim minista bilong PNG. Mi bilip Gren Sif Sir Michael Somare i lus tingting pinis long ol manmeri bilong SIMBAI. Bipo Sir Michael Somare i pinis em mas i go na tok sori long ol SIMBAI olsem em lus i tingting long ol pinis.

ATTENTION!
Grade 10, 12 School leavers
& Working Class...
On its 17th year...

INTERNATIONAL TRAINING INSTITUTE

Accredited & Recognized by the Government as a HIGHER EDUCATION PROVIDER!

APPLICATION IS OPEN FOR OCTOBER INTAKE

"Make the Decision today for a better Tomorrow"

Happy 41st Independence Day

<p>Certificate Courses (Day & Night Class)</p> <ul style="list-style-type: none"> ▶ Certificate in Computing ▶ Certificate in Accounting ▶ Certificate in HR Management ▶ Certificate in Business ▶ Certificate in Sales 	<p>Diploma Courses (Day & Night Class)</p> <ul style="list-style-type: none"> ▶ Diploma in Accounting ▶ Diploma in Management ▶ Diploma in Marketing ▶ Diploma in HR Management ▶ Diploma in Information Technology
--	---

We offer Day & Night Classes

Drop-off, Transport provided for Night Class Students

Contact details:

POM Campus Phone: 320 2800
 Mob: 76850523
 Email: srose@iti.ac.pg

LAE Campus Phone: 472 2790
 Mob: 73428032
 Email: enquires.lae@iti.ac.pg

Website: www.iti.ac.pg
 Like us on Facebook

"Investing in quality & affordable education for your future"



Independence Message

Custodians of tomorrow

From the Mountains to the Seas, a people of a thousand different tribes. Proud in Culture, Rich in heritage. Diverse and unique yet united as one. Our country, our land, our resources, our Papua New Guinea.

Happy 41st Independence Anniversary.



**My Country, My Future
Papua New Guinea**

Nupela taun bai bringim planti bisnis

NUPELA grot senta o nupela taun long Angore PDL 8 long Hela bai bringim planti sans long larim ol manmeri long ples i statim nupela liklik bisnis.

Siaman bilong Angore Wellhead Leadership Committee, Hari John Akipe, i tok kontrakata bilong mekim sevei i mekim pinis ol wok sevei na i katim boda na mak pinis.

Em i tok namba wan projek bai lukim Oil Search i kirapim nupela polis stesin long Angore.

“Polis stesin em i namba wan samting. Em bai daunim pasin bilong lo na oda na helpim ol manmeri long komyuniti i stap isi,” Mista Akipe i tok.

Em i tok dispela nupela senta bai lukim olsem Angore bai gat wanpela liklik taun bilong em yet.

“Grot Senta i soim olsem Angore bai gat taun. Ol stua na bisnis bai stap. Maket bai stap. Skul, sios, haus sik na arapela sevis bai stap,” Mista Akipe i tok.

Em i tok AWLC i wok long wok bung wantaim Angore Special Purpose Authority (ASPA) long kirapim dispela grot senta o liklik taun.

“Sans bilong statim ol liklik bisnis em i kam nau. Mipela bai helpim ol manmeri long ples long senisim pasin na statim liklik bisnis,” Mista Akipe i tok.

Em i tok tupela blok kampani bilong Angore PDL 8, Angore Holdings Limited na T.T. Angore Noa Hai Investment Limited, i wok long statim gut bisnis na dispela i soim olsem ol manmeri long ples i laikim senis na gutpela samting.

“Mi gat bikpela bilip. Taim grot senta i kirap, planti manmeri bai statim bisnis. Na mipela i redi long helpim ol, bikos dispela em i gutpela samting ol i laik mekim,” Mista Akipe i tok.

Mista Akipe i mekim dispela toktok long las wik taim em i kisim sampela ol nius manmeri i go long Angore PDL 8 na soim ol long tripela welhet na ples long Angore.

Bikpela bulumakau fam bai kamap long PNG

LR Group i laik kirapim wanpela bikpela fam bilong lukautim ol bulmakau long PNG.

Dispela kampani bilong Israel i laik kirapim strong egrikalsa sekta bilong dispela kantri taim gavman i givim baksait na lukluk i go long oil na ges na mineral sekta.

Mani bilong kirapim dispela bikpela egrikalsa projek bai kam long Bank Leumi long Israel.

Dispela bikpela benk bilong Israel i bin wanbel long fandim K110 milien long mekim dispela wok long PNG.

LR Group i no tokaut long wanem hap stret insait long PNG bai ol i putim dispela bikpela fam bilong lukautim bulmakau na kamapim ol samting olsem susu, mit na arapela samting long ol bulmakau.

Tupela papa bilong kampani, Ami Lustig na Roy Ben Yami, i tok Bank Leumi bai givim dispela mani long LR Group wanatim projek patna bilong en.

LR Group i wok long mekim planti gutpela invesmen long sait bilong egrikalsa na pawa saplai long PNG.

Gavman i sapotim dispela gutpela wok bilong LR Grup long PNG. Ol bai kirapim bikpela fam long Sepik plein, long Surunki long Enga, Koroba long Hela, na Makham long Morobe provins.

Ol i gat bikpela fam bilong ol pinis long 9-Mail ausait long Pot Mosbi.

Yusim Komo ples balus, Nerau i tok

KOMO Ples Balus long Hela Provins i mas kamapim gutpela samting we PNG i ken kisim benefit o gutpela kaikai bilong en Siaman bilong Kumul Consolidated Holdings Limited (KCH), Paul Nerau, i tok.

Mista Nerau i tok Hela i gat bikpela sans long kirapim turis bisnis na dispela bikpela ples balus i ken bringim moa benefit long sait bilong turis bisnis sapos gavman i larim komesal flait i kamap long Komo.

“I gat bikpela sans long mekim bisnis i stap long Komo. Turis bisnis em i wanpela bikpela sans tru we Hela i gat,” Mista Nerau i tok.

Mista Nerau i tok gavman i mas yusim dispela ples balus long larim ol manmeri i kisim benefit.

“Ples balus ya i no ken stap nating. Gavman i ken kirapim ol samting long Komo na kirapim dispela bikpela ples

balus hap we ol turis long ovasis i ken kam insait long kantri,” Mista Nerau i tok.

Em i tok dispela ples balus i mas mekim sampela gutpela samting long kirapim ikonomi bilong dispela kantri na kirapim bisnis.

“Yumi mas kirapim planti kampani long ol pikinini bilong yumi i ken wok, mekim mani na kisim benefit,” Mista Nerau i tok.

ExxonMobil PNG, opereta bilong PNG LNG Projek i bin kirapim dispela bikpela ples balus long taim bilong konstraksen wok bilong dispela bikpela ges projek.

Gavman i no opim komesal flait i go long Komo ples balus tasol ExxonMobil i yusim long balus sata long kisim ol wok manmeri i go kam long Hides and Komo.

Praim Minista Peter O’Neill i bin tok gavman bai opim Komo ples balus na larim ol komesal flait i



Komo ples balus long Hela Provins.

kamap tasol dispela toktok bilong em i no karim kaikai.

Mista O’Neill i bin mekim dispela toktok long las yia tasol komesal flait i no kamap yet.

Memba bilong Kom-Margarima, Francis Potape, i laikim gavman long kamapim komesal flait long dispela bikpela ples balus i stap insait long ilektoret bilong em.

PNG kamap namba wan treiding patna bilong Korea



Ol wokman bilong wanpela biknem oil na ges kampani bilong Saut Korea, Kogas, husat i laik kam insait long PNG.

TRED namel long PNG na Saut Korea i kamap bikpela na PNG i kamap namba wan tred patna bilong Saut Korea.

Embasesa bilong Saut Korea long PNG, Kim Seong-Choon, i tok tred namel long tupela kantri i gro i go moa yet na winim narapela kantri insait long Pasifik rijon.

Mista Seong-Choon i autim dispela toktok long namba wan Korea-PNG Dialogue Forum we National Research Institute (NRI) i bin holim long Pot Mosbi long las wik Fonde.

“Tred namel long tupela kantri bilong yumi i wok long gro i go bikpela. Em i

150 moa long arapela liklik Saut Pasifik kantri,” Mista Seong-Choon i tok.

Em i tok planti ol kampani bilong Saut Korea i bin kirapim ol haidro, pawa plent, ples balus, sip bris na arapela ol bikpela konstraksen wok long PNG.

“Long sait blong praivet sekta, ol invesmen bilong Saut Korea i stap long fiseris, egrikalsa, konstraksen and teknoloji,” em i tok.

Mista Seong-Choon i tok long sait bilong bisnis na invesmen, Saut Korea i wok long stat long lukluk long salim planti kampani i kam insait long PNG long invest na mekim bisnis.

“Planti kampani bilong Saut Korea i laik mekim bisnis na i kam insait pinis long kantri. Dispela i soim olsem Saut Korea i gat bikpela bilip long ikonomi bilong PNG,” Mista Seong-Choon i tok.

Dispela yia bai mekim 40 yia we PNG na Saut Korea i bin statim poroman. Long makim dispela 40 yia, Saut Korea i kamapim dispela namba wan bung bilong Korea-PNG Dialogue Forum long NRI.

Mista Seong-Choon i tok as bilong dispela forum em long strongim pasin poroman namel, bisnis na invesmen namel long tupela kantri.

Kampani bilong Saut Korea laik kam insait long PNG

PNG i sainim wanpela agrimen wantaim wanpela biknem kampani bilong Saut Korea.

Dispela kampani bilong Saut Korea i save kirapim ol bikpela haidro pawa stesin na em i laik kam insait long PNG.

Korea Southern Power (Kospo) i sainim wanpela memorandum ov andas-tending long las wik Fraide wantaim Dipatmen ov Woks na Implementesen long kirapim haidro pawa.

Presiden bilong Kospo, Jong Geun Yoon, na tupela senia eksekutiv Geun Tag Lee wantaim Jong Sik Lee bai kam raun long PNG long strongim dispela patnasip long wokbung wantaim na kirapim ol haidro pawa projek long PNG.

PNG i gat kampani bilong em, PNG Power, i stap long kirapim ol haidro na menesim pawa na eneji saplai long kantri tasol planti ol gavman ejensi olsem Woks Dipatmen na Dipatmen ov Pablik Entaprais no save bilip long PNG Power.

Woks Dipatmen i sainim dispela agrimen wantaim Kospo taim Korea-PNG Dialogue Forum long NRI i bin toktok long promotim moa patnasip namel long tupela kantri long tred na invesmen.



Buldosa i brukim graun long nupela rot long Negrie i go long Tangori na long Negrie i go long Baimuru. Ol pipel i bung long lukim ol i brukim graun bilong tupela nupela rot long Yangoru-Saussia distrik.

Yangoru-Saussia distrik bai gat gutpela rot sistem

MEMBA bilong Yangoru-Saussia Distrik husat i Minista bilong Tred, Komes na Industri, Richard Maru i gat strongpela tingting long bungim olgeta ples bilong distrik bilong em wantaim gutpela rot sistem pastaim long taim bilong em long dispela gavman bai pinis.

Minista Maru i tokaut long tingting na plen bilong em dispela wik long taim bilong brukim graun seremoni bilong tupela nupela rot long distrik long stat bilong dispela mun.

Tupela nupela rot em bilong Negrie i go long Tangori rot we bai kisim mani mak bilong K800,000 long wokim, na narapela em Negrie i go long Baimuru rot we bai ol i wokim wantaim mani mak bilong K350,000.

I gat 6-spela rot long distrik ol bai wok long ol insait long ol wik i kam. Distrik bai givim ol kontrak bilong narapela tripela rot klostu taim na bai ol i mekim moa inap yia i pinis.

“Plen bilong distrik em long lukim olsem pastaim long taim bilong palamen i pinis, wan wan ples long olgeta 4-pela LLG long distrik bai gat rot koneksen. Mipela i laikim ol pipel i gat gutpela sevis,” Minista Maru i tok.

Minista i tok em i laikim ol pipel bilong em long lukautim gut ol developmen olsem bikos long 40 yia ol pipel i bin kisim taim long ol besik sevis olsem rot i no bin stap. Em i tokim ol pipel

long no ken singaut long kompensesen long ol graun bilong ol taim rot i go antap long en.

“Ol dispela rot bai helpim ol ples man na meri long bringim ol kumu na kaikai bilong gaden i go long ol maket long salim. Ol bai inap long kisim ol sik lain bilong ol i go long ol etpos i stap klostu o go long Wewak taun long baim ol samting bilong stua. Bipo ol i save wokabout longpela hap tru long kisim ol kain sevis olsem. Ol i save go long bikpela rot na kisim ol PMV long go long Wewak taun. Ol i ken wokim ol skul insait long ol ples longwe tasol ol bai gat sevis yet bikos long gutpela rot i stap. Ol tisa bai amamas long stap long ol skul i stap longwe bikos nau bai i gat rot. Planti ples i no bin lukim wanpela gutpela rot inap 40 yia insait long ol Sepik Pleins na long antap long ol maunten (Prins Alexander Range) long distrik,” Minista Maru i tok.

“Em i no isi long wokim ol rot i go antap long maunten we i gat bikpela hap tru na ol sait maunten we i hat long go antap long en tasol mipela i mekim gutpela wok tru long karamapim sampela bilong dispela hap nau. Sapos mipela karamapim olgeta hap bilong ol maunten na ol ples daun insait long taim bilong dispela palamen yet, em bai stori bilong mipela inap go insait long stori bilong distrik long bihain taim,” Mista Maru i tok.

Konsevesen NGO givim kit bilong lukautim “Bilas”

I kam long WCS PNG Media

WILDLIFE Konsevesen Sosaiti (WCS) i kamapim wanpela kempen long “Strongim kastom – Lukautim Bilas Bilong Yu,” long taim bilong namba 60 Goroka Kalsa So long dispela wiken stat long 16 Septemba i go inap long 18 Septemba.

Planti kalsa grup bai bung long selebretim namba 41 indipendens de bilong kantri wantaim ol tumbuna bilas bilong ol. Tasol long kain taim olsem yu save tingim hamas pisin na enimal i dai long kamapim ol dispela tumbuna bilas o nogat?

WCS PNG i kamapim kepen bilong ol “Strongim Kastom – Lukautim Bilas Bilong Yu,” we ol bai givim 250 lukautim “bilas” kit nating i go long helpim ol kalsa grup na ol lain husat i gat “bilas” long lukautim ol tumbuna bilas bilong ol gut. Ol i makim tru long ol lain husat i save yusim ol kangal bilong ol retpela kalangar (Vulturine Parrot).

Vulturine Parrot em ol pisin we i gat naispela retpela kangal we ol pipel bilong Hailans bilong PNG i save laikim long bilas bilong het long taim bilong singsing na selebresen.

Ol dispela perot i klostu long pinis olgeta nau bikos ol pipel i save painim na kilim olgeta taim long wokim bilas bilong tumbuna.

WCS risetsa Grace Nugi, pastaim Mis PNG, i bin painim olsem moa long 54,000 papa bilong bilas insait long

Kerowagi tasol na dispela em inap long kisim kangal bilong moa long 432,000 Vulturine Perot long wokim bilas bilong ol.

Mis Nugi i painim aut olsem ol samting bilong bilas i save stap inap 20 yia tasol em i ting olsem inap long wanpela pisin namel long 10-pela pisin insait long bus bai ol i kilim long inapim ol bilas bilong het insait long Kerowagi distrik tasol.

WCS i laik helpim long larim laip bilong ol bilas samting i go longpela taim wantaim ol dispela kit ol i givim aut long ol bilas bai no ken bagarap o binatang bai i no inap kaikai na bagarapim.

Wan wan bilong ol dispela kit i gat plastik na pepa karamap, marasin bilong kilim kokoros na tok save bilong yusim kit. Ol i putim tu ol giaman kangal bilong Vulturine Perot insait long kit long ol pipel bai i ken yusim long stretim ol liklik bagarap long ol hetdres o bilas bilong het.

WCS i laikim olsem laip bilong ol hetdres bai stap inap 4-pela o 5-pela yia na ol dispela kit bai stopim ol kain bagarap long wan wan bilas bilong het, wanpela pisin bai i no inap dai long bekim ol wan wan kangal i kamaut long ol bilas.

WCS bai putim wanpela stol o tebol long dispela Fraide i go Sande long givimaut tok save bilong dispela na ol askim olgeta lain husat i laikim i ken go lukim ol long Goroka So.

WHITE TUNA FLAKES
DIANA White

WHITE TUNA insait K 2.20

DIANA Barbecue Flavour

Tasty and Flavourful White Tuna for Everyone!

Manufactured by: **RD Tuna Cannery Ltd.**

US Open: Kerber i win long singel taitel bilong ol meri



Angelique Kerber i holim US Open tropi.

ANGELIQUE i winim US Open tenis long las wik Sarere we em i kamap namba wan long wol bihain long em i daunim Karolina Pliskova long namba tu Gren Slam taitel bilong em long yia.

Kerber bilong Jemani i daunim meri Czech wantaim 6-3, 4-6, 6-4 long namba tri set.

Em i skruim US Open kraun i go long Australian Open taitel em i bin winim long Janeri.

“Mi gat bikpela amamas long winim namba tu Gren Slam long wanpela yia,” Kerber i tok.

“Dispela em namba wan yia long wok bilong mi olsem pilaia.

“Mi bin stap long Nu Yok long 5-pela yia i go taim mi go insait long semi-fainal resis na nau mi stap long hia wantaim tropi na em i bikpela samting tru long laip bilong mi.”

Kerber i gat 28 krismas, i

bin winim Serena Williams long fainal long Melbourne na i lus long Wimbledon fainal, i bin kamap wol namba wan long Mande.

“Long kamap namba wan na winim Gran Slam taitel em i driman bilong mi long olgeta taim inap long taim mi liklik meri yet,” Kerber i tok.

Pliskova em i namba foa meri long winim Venus na Serena Williams long Gren Slam fainal.

US Open: Wawrinka i winim namba tri meja



Namba tri meja taitel... Stan Wawrinka i pusim em yet i go antap egensim Novak Djokovic.

STAN Wawrinka i kamap sempion long US Open resis bilong ol man taim em i daunim wol namba wan pilaia, Novak Djokovic, na i kisim namba tri meja singel taitel long Flushing Meadows, Nu Yok.

Wawrinka i winim dispela tenis taitel wantaim 6-7 (1-7),

6-4, 7-5, 6-3 set bihain long resis i kamap insait long 4-pela aua.

Dispela em i namba wan Nu Yok taitel, bihain long em i bin pilai strong long 2014 Australian Open na 2015 Roland Garros kraun.

Stan i pinisim rana-ap long

Nu Yok long namba foa taim bihain long em i tripela bilong 17 malolo poin.

Djokovic i traim hat long kisim sampela poin tasol, Wawrinka i pilai gut insait long 9-pela aua bilong resis taim na i go fainal taim em i sevim tupela set poin.

OI Panther bai salensim Canberra long semi fainal



OI Panther i pulap long pilai graun. Tyrone Peachey bilong ol Panther long namel i ran i go long trai lain long putim trai.

OL Penrith Panther i daunim ol Canterbury Bulldog, 28-12, na ol bai pilai semi-fainal resis egensim ol Canberra Raider long dispela wiken.

Semi fainal resis bai kamap long Canberra namel long tupela strong-pela birua we ol Raider i bin winim 10-pela gem na i no gat wanpela lus, nogat. Na,

ol Panther i winim 6-pela gem long na i no gat wanpela lus tu.

Matt Moylan i bin go pas long ol Panther na ol i bin daunim ol Bulldog long las wik Sande apinun.

Long stat bilong pilai i kamap long Sydney Futbol Stediam, ol Canterbury i pilai strong long asples bilong ol Panther na ol i bin

putim namba wan trai long 14 minit bilong resis taim.

Bihain long sampela minit, ol Panther i bin bekim trai bilong ol Bulldog.

OI Panther bin i putim narapela trai gen long namba 75 minit na resis taim bilong Bulldog i kam mak bihain long ol i lus namba foa taim egensim ol Panther.

Henry i belhat long ol Titan i lus

KOSA bilong ol Gold Coast Titan, Neil Henry, i bin belhat bihain long ol Titan i lus, 44-28, long fainal resis bilong Nesenel Ragbi Lig (NRL) egensim ol Brisbane Broncos.

Long wankain taim ol i bin sasim James Roberts long em i kikim Ryan Simpkins long Lang Park long las wik Fraide nait.

Kosa bilong ol Broncos, Wayne Bennett, i traim long stretim dispela asua i bin kamap na Henry i bin belhat long Roberts i bin go aut long taim ol i bin pilai yet.

Roberts i no bin mekim wanpela bikpela asua we



Wanpela Taitan i apil long ol opisal long skoa bilong ol Broncos.

em bai no inap long pilai narapela fainal resis bai kamap sapos em i no win long kot.

OI bai rivi long dispela asua na i tok long rausim wanpela trai bilong ol Broncos.


Cook i dai bihain long ol i takolim em

GRANT Cook long Gold Coast i dai long haus sik bihain long em i bin pundaun long taim bilong ragbi resis long not bilong Nu Saut Wels.

Cook i bilong Coolangatta, i bin pilai long asples bilong em long Murwillumbah Mustangs long preliminari fainal long las wik Sande apinun. Em i bin pundaun bihain long ol i takolim em bipo long hap taim.

Cook em i papa bilong tupela pikinini. Ol i bin kisim em i go long haus sik long Gold Coast Yunivesiti tasol em i bin dai.

Meri bilong Cook, Colleen, i tok, “Namba wan man bilong mi, Grant, i kamap enjel nau na i lukluk long mipela i stap. “Laip bilong mipela bai



Grant Cook wantaim meri bilong em, Colleen.

bagarap nau. Em i lusim wanpela bikpela spes long lewa bilong mi na ol papa, mama na famili bilong em i stap long wankain hevi.

“God i kisim em bek kwiktait bikos i gat as tingting i

stap, long wanem em i kisim em long yangpela taim,” Colleen i tok.

Presiden bilong Noten Riva Rijonal Ragbi Lig, Brian Rix, i tok, dai bilong Cook i brukim lewa bilong mipela



Wok Operesen bilong Ramu NiCo givim strong long MCC

KIRAPIM wok na go het bilong Ramu Nikel Projek long Madang provins na PNG i givim strong na gutpela tingting long Metallurgical Corporation of China (MCC) long di-velopim ovasis maket na lukluk moa long kamapim wok bisnis bilong en long wol.

Presiden bilong Ramu NiCo Menesmen (MCC) Ltd, Wang Jicheng i tokaut long dispela long las wik Fonde taim em i serim ekpiriens bilong Kampani long Madang Investmen samit i bin kamap long Madang Risot Hotel.

Dispela Madang Invesmen Samit long Trinde Septemba 7 i go Fraide, Septemba 9, 2016 em Madang provinsal gavman wantaim Ramu Dvelopmen Faundesen i redim long promotim Madang provins long bringim ol investa long go wokim bisnis wok long hap.

Ramu NiCo i bin sapotim dispela samit wantaim K10,000 na long Fonde, Presiden Wang i bin go toktok na serim ekpiriens bilong Ramu NiCo olsem bikpela investa insait long provins.

Mista Wang i tok olsem gohet long wok bilong Ramu NiCo Projek i kamap gut bikos ol i bihainim nupela rot na stail bilong ol yet long operesen we i karamapim wok antap long Kurumbukari Main i go daun long Basamuk Rifaineri. Dispela em narakain long plen bilong pastaim eksplora na patna Highlands Pacific Limited (HPL) i bin kamap wantaim long fisibiliti stadi bilong en.

Em i tokaut tu olsem skelim bilong Ramu NiCo Menesmen na ol menesmen sistem bilong en em i wok long yusim, kost bilong prodaksen em daunbilo insait long ol yia i go pinis, tasol bikpela wok em Kampani i wokim insait long prodaksen, maski olsem

prais bilong nikel long wol i daunbilo.

“Tude mipela i amamas olsem Ramu NiCo em wanpela intenesenel maining projek. Dispela projek i putim em yet olsem wanpela wol-klas joint vensa projek we i bungim laterait maining, benefisiesin na rifaining. Olgeta dispela ol bikpela wok kamap bihain long planti salens na hevi Kampani i bungim, tasol i sanap strong yet,” Mista Wang i tok.

Em i tokaut tu olsem Ramu NiCo em wanpela bikpela investmen o entaprais bilong Saina gavman long Saut Pasifik. Na em bikpela ovasis mineral risos investmen bilong MCC. Olsem na Ramu Nikel Projek em opim rot bilong MCC long kamapim na. di-velopim ol ovasis maket bilong en.

Mista Wang i tok klia olsem ol bikpela wok divelopmen Ramu NiCo i kamapim long Kurumbukari, Basamuk na Madang i no kam isi. Kampani i bungim planti bikpela salens tru long sait long teknikel wok, hevi long main, menesmen salens, na hevi long rot long bringim ol saplai i go insait long wok eria na tu hevi long sekyuriti. Wok bilong kamapim rot na bris long bringim ol saplai na samting bilong wok i bin bikpela salens tru bikos tupela eria bilong operesen bilong Kampani i stap longwe long taun na bikpela haiwe.

“Tude operesen bilong mipela i kamap orait long mak olsem 95 pesen, na mipela i bilip olsem long pinis bilong dispela mipela bai kamap long 100 disain mak bilong prodaksen,” Mista Wang i tok.

Em i tok Ramu NiCo em wanpela bikpela intenesenel investa long Madang provins na em i lukim olsem kain invesmen samit o kibung em bikpela samting tru bikos Madang i ken soim em yet na bringim sampela moa investa bilong autsait i kam insait.




Wang Jicheng i toktok long Madang Invesmen Samit na serim ekpiriens bilong Kampani long Madang provins.



Memba bilong Usino-Bundi and Vais Minista bilong Pablik Entaprais na Stet Invesmen, Anton Yagama i welkam long Mista Wang long Madang Risot.



Minista Maru wantaim Madang Gavana Jim Kas, Minista Nixon Duban na Mista Anton Yagama long Madang Invesmen Samit long las wik.



Netbal resis bai kamap long Indipendens wiken

NESENEL Geming Kontrol Bod senia netbal nesene sempionsip resis bai kamap long dispela wiken long Pot Mosbi long amamasim independens de.

Sempionsip resis bai stat long Fraide wantaim opening seremoni bai kamap long 3 klok i go inap long 5 klok apinun long Rita Flynn netbal kot.

Ol gem bai kamap long Sarere na Sande aninit long tripela divisen olsem A gret, B gret na Masta.

Presiden bilong PNG Net-

bal, Julienne Leka Maliaki, i tokaut olsem ol asosiesen bai resis em Jiwaka, Goroka, Is Nu Briten, Kavieng, Madang, Lae, Alotau, Pot Mosbi, Motu Koita Saut, Motu Koita Wes na Kairuku-Hiri.

"Nesene taitel bilong 2016 em i wanpela bikpela samting bilong ol pilaia long ol bai i gat sans bilong ol selekta i ken lukim na makim ol long open trening skwat na tu, ol bai stap wantaim long tupela yia hai pefomens program bilong nesene tim," Maliaki i tok.

POMRFL gren fainol bai kamap long Sande

GREN fainol bilong Pot Mosbi Ragbi Futbal Lig (POMRFL) sisen bilong dispela yia bai kamap long Sande long Nesene Futbal Stediam (NFS).

Dispela bai kamap bihain long ol i pinisim ol preliminari fainol long ol divisen bilong ol man long A gret na anda 20 long las wiken.

Ol Paga Panther bai pilai egensim ol Hohola Flies long A gret na long anda 20 em ol

South bai pilai egensim ol difending sempion.

Preliminari fainol bilong ol meri i bin kamap asde we ol Royal i pilai egensim ol South, taim ol Paga Panther i stap sambai long gren fainol.

Meke Maino bilong POMRFL i tok, ol bod i askim tok orait long ol menesmen bilong NFS pilai graun long wanpela gren fainol resis i ken kamap long NFS.

Volibal nesene sempionsip i stat pinis

NESENEL Volibal Sempionsip bilong yia 2016 i stat pinis long Taurama Akwatik Senta long Pot Mosbi.

Sempionsip i stat long Mande wantaim anda 20 man na meri we ol fainol i bin kamap asde.

Dairektra bilong Tonamen, Joey Sena, i tok 32 tim, 18 tim bilong ol man na 14 tim bilong ol meri, i bin rejista long pilai.

Em i tok olsem open tim bilong ol man na meri bai

statim resis tude na ol fainol bai kamap long Sande.

"I gat 27 tim bilong ol man na 20 tim bilong ol meri bai resis long open divisen," Sena i tok.

Volibal sempionsip i bin kamap long las taim em long yia 2014 we VAVA em ol sempion bilong ol man na Fairfax em ol sempion bilong ol meri.

Long anda 21 divisen, VAVA i kamap sempion gen na NCDV i kamap sempion bilong ol meri.

PPL i sapotim sofbal resis wantaim K40,000



Ol wokman bilong PNG Pawa Limited (PPL) i givim K40,000 sek long strongim wok poroman bilong ol wantaim spot.

MEJA sponsa bilong softball, PNG Pawa Limited (PPL), i givim K40, 000 long sapotim sofbal resis bai kamap long Mt Hagen, Westen Hailans Provins.

Mt Hagen i redi long go pas long namba 29 Nesene softball resis bai kamap long 15 i go inap long 18 Septemba long Rabiamul pilai graun.


Dispela klap sempionsip em ol i yusim tu long salim tok

save i go long ol pipel bilong Mt Hagen long stopim ol pawa koneksen we ol i no bihain gutpela rot.

Moa long 10-pela yia i go pinis inap long softball sempionsip resis i bin kamap long Mt Hagen long yia 1997.

PNG pawa i poroman wantaim spot inap long 5-pela yia i go na klap sempionsip bilong dispela yia i strongim moa dispela wok pren.

NCD i redi long hoki resis



Tim Red na Blu i traim pilai hoki long redi long resis i stat long Fraide.

HRH Prins Edward bai kamap long Spot Samit long Keneda

NAMBA tu petron bilong Komonwelt Gem Federesen, HRH Prins Edward, bai kamap namba wan man long joinim ol lida bilong spot na ol stekholda long olgeta hap bilong Keneda na ol 71 kantri bilong Komonwelt bai go bung long Komonwelt Spot Samit.

Dispela bung bai kamap long Oktoba 6 long Edmonton, Alberta, olsem pat bilong tripela de Jenerel Asembli bilong Komonwelt Gem Federesen.

As tingting bilong dispela bung em ol bai toktok long gavman, ogenaesenel kalsa, intagriti, jenda ikwliti, yumen rait,

na spot bilong developmen na pis.

Presiden bilong Komonwelt Gems Federesen, Louise Martin, i tok, nupela Komonwelt Spot Samit bai kirapim tingting long toktok wantaim ol lida bilong spot long olgeta hap bilong Keneda na long ol Komonwelt kantri long bringim senis i kam long yia 2022.

"Mi gat bikpela amamas na tok tenkyu long planti ol namba wan spika bai kam na toktok long sapotim na developim Komonwelt Spot Muvmen long tude i go inap long bihain taim," Martin i tok.

POT Mosbi Hoki Asosiesen (PMHA) i tokaut long nem bilong 14 tim bai resis long 2016 NCD hoki tonamen we NCDV i sponsa na PMHA bai go pas long dispela resis.

Ol 14 tim i kisim ol pilaia long ol wan wan klap insait long PMHA resis na i bruk i go long wan wan divisen na kala long resis insait long tripela de raun robin gem.

Ol tim kala na divisen em Junia man na meri, Grey, Elite 1 man na meri, Blue, Elit 2 man na meri, Gold, Senia 1 man na meri, White, Senia 2 man na meri, Marun, Senia 3 meri tasol, Red, Masta 1 man na meri, Grin na Masta 2 meri tasol em ol pepol.

Tonamen em i hap bilong amamasim de bilong Independens na bai stat long Fraide, Septemba 16 i go inap long Sande, Septemba 18.

Tsaka i tokaut long PM XIII skwat

SIAMAN bilong Papua Niugini Ragbi Futbal Lig (PNGRFL) i tokaut long skwat bilong Papua Niugini NGCB Praim Minista XIII long Mande long Nesenel Futbal Stediam, Pot Mosbi.

Ol i makim ol lokal pilaia long ol ragbi resis i kamap long PNG olsem Digicel Kap. Ol i kisim tupela pilaia long Nesenel Ragbi Lig Sempionsip i kamap long Lae, Morobe Provins, na 5-pela pilaia husat i save pilai long Australia.

Long ol pilaia i kam long Australia, tripela i pilaia bilong Townsville Blackhawks, Rhyse Martin, Willie Minoga na Ray Thompson, na tupela i pilaia bilong Gold Coast Titan, Nene McDonald na David Mead.

Ol i makim tupela pilaia long sempionsip long Lae em Yoks Bagave long Sauten Konfederet Senia na Peter Muka Kulu long Sauten Konfederet Anda-20 em tupela yangpela pilaia long tim.

As tingting bilong Praim Minista XIII bilong dispela yia em "Stopim Vailens" na siaman i amamas long tokaut long tim husat bai pilai egensim Australia long 24 Septemba long wik i kam long Nesenel Futbal Stediam.

Ol 25 man skwat bilong PNG NGCB PM XIII em; Bland Abavu bilong PNG

Hunter, Ilai Alu bilong Agmark Rabaul Guria, Pasu Awane bilong Lae Snax Tiger, Yoks Bagave bilong Sauten Konfederet Senia, Anderson Benford bilong Lae Snax Tiger, Konnie Bernard bilong Rabaul Agmark Guria, Ase Boas bilong PNG Hunter, Bradley Brawa bilong TNA Simbu Lion, Bernard Goma bilong Gulf Isapea, Noel Joel bilong Lae Snax Tiger, Mafu Kalas bilong Lae Snax Tiger, Peter Muka Kulu bilong Sauten Konfederet Anda 20, David Loko bilong Lae Snax Tiger, Rhyse Martin bilong Townsville Blackhawks, Nene McDonald bilong Titan, David Mead bilong Titan, Willie Minoga bilong Townsville Blackhawk, Butler Morris bilong PNG Hunter, Justin Olam bilong PNG Hunter, Kingston Paul bilong Enga Miok, Brandy Peter bilong PNG Hunter, Wartovo Puara Jnr bilong PNG Hunter, Junior Rop bilong Lae Snax Tiger, Esau Siune bilong PNG Hunter na Ray Tompson bilong Townsville Blackhawk.

Kosa bilong PNG Hunter, Michael Marum bai kamap kosa bilong Kumul long NGCB PM XIII resis na kosa bilong Lae Snax Tiger, Stanley Tepend, bai kamap asisten kosa bilong ol Kumul.

Wass Matau sapatim Madang volibal tim

James G. Kila i raitim

WANPELA lokal lenona kampani i soim tru olsem em i gat bel hevi long helpim ol yut long pilai spot taim em i givim ol trening yunifom na ol bal i go long Madang volibal skwat we bai go pilai long namba 7 PNG Gems long Kimbe.

Jeneral menesa bilong lenona kampani, Wass Matau Limited, Danny Gabong long Tunde, September 6, 2016 i givim helpim i go long Madang volibal skwat long Laiwaden oval long Madang taun.

Gabong i tokim ol pilaia na menesmen tim olsem kampani i amamas long helpim ol wantaim ol bal na trening yunifom bikos em bai kirapim bel bilong ol na kamapim tim spirit na ol i ken pilai gut.

Em i tok dispela em namba wan taim bilong Wass Matau long helpim wanpela spot tasol. Long pastaim kampani i bin givim helpim olsem K35,000 i go long sapatim Tim Madang.

Wass Matau em wanpela long foapela lenona aso-siesen insait long Ramu Nikel Projek long Madang. Eria bilong Wass Matau i kara-mapim Kostal Paipain eria, na em wanpela lenona kampani



Jeneral Menesa bilong Wass Matau Limited, Danny Gabong, long lephan i givim bal na nupela trening yunifom long Madang volibal skwat.
Foto: James G. Kila

tasol i save mekim gut stret long sosel na kopret wok bilong em long helpim ol sios, yut na mama grup long projek eria bilong em.

Gabong i tok em i laikim Madang volibal tim i mas mekim gut long Kimbe na mekim kampani na ol pipel bilong Madang i amamas.

Madang Provinsal Volibal dairekta, Bebs Merire i tok Madang i gat 36 lain insait tim wantaim menesmen tu. Insait

long dispela skwat i gat indo volibal na tu bis volibal bilong ol man na meri. Ol pilaia i kam long olgeta 6-pela distrik long Madang.

Asisten menesa bilong Madang volibal tim, Danny Mulou i tok olsem bikipela laik nau em long Madang i mas pilai gut na i mas gat wanpela o tupela lain man o meri insait long PNG tim. Dispela bai promotim volibal spot insait long Madang provins.



PNG Air

CENTRAL RESERVATIONS

Phone: + 675 7222 2151 | Fax: + 675 325 4867
TOLL FREE NUMBER 16111 | Email: reservations@pngair.com.pg

LOC i makim tripela meri Veniu Jeneral Menesa



Ol 4-pela VGM (L-R) Frederica Sakette Emmanuel Popoitai, Toka Kini-Aua and Grace Yohang-Mataio

OL meri bai go pas tru long FIFA U-20 Wimens Wol Kap olsem na ol i makim pinis tripela meri long kamap Veniu Jeneral Menesa (VGM) long strongim dispela tingting.

Tripela meri VGM em Toka Kini-Aua, Grace Yohang-Mataio and Frederica Sakette bai ranim opere-sen bilong Sir John Guise stadium, Nesenel Futbol Stadium na PNG Futbol Stadium.

Lokal Ogenaising Komiti sif eksekutiv opisa, Seamus Marten i tok FIFA U-20 Womens Wol Kap slogan em i tok, 'To Inspire, To Excel' na mipela i amamas long gat dispela tripela meri long holim ol bikpela wok olsem.

"Mipela i laik kirapim tingting bilong ol meri long pilai futbol na tu long kirapim ol meri long kisim wok bilong futbol edministresen," em i tok.

Misis Aua bai lukautim Sir John Guise Stadium, Mis Sakette bai lukautim PNG Futbol Stadium na Yohang-Mataio bai lukautim Nesenel Futbol Stadium.

Frederica Sakette i bin holim wok bilong pilai futbol moa long 20 yia. Em i bin kirap long pilai futbol i go long kamap wanpela kosa na inap em i kamap wanpela edministreta. Mis Sakette i lukim dispela sans bilong em olsem switpela krim antap long kek bilong wok bilong em.

Mis Kini-Aua em i wanpela netball pilaia na Yohang-Mataio em i wanpela akaunten. Olgeta tripela meri i tokaut olsem ol i wanbel long ol i makim ol na long wok we ol bai mekim long taim bilong Wol Kap.

Bava Pak stadium em bai aninit long menesmen bilong Emmanuel Popoitai.

Emmanuel Popoitai, wan-

pela man bilong pilai futbol em i gat bikpela laikim bilong pilai soka. Em i ting olsem wok bilong em long menesim wanpela stadium em i wanpela presen na em bai holim pas long lewa bilong em oltaim long laip bilong em.

Ol dispela 4-pela VGM bai go long Jordan long stap insait long FIFA U-17 Wimen Wol Kap we bai kamap long pinis bilong dispela mun, bilong ol i ken kisim sampela save long wok ol bai mekim long taim bilong FIFA U-20 Wimens Wol Kap Papua Niugini 2016 long Novemba.

Mista Marten i tok dispela wokabaut bai gutpela tru long ol 4-pela bikos ol bai kisim moa save long wanem kain wok ol bai wokim long taim bilong tonamen.

FIFA U-20 Wimens Wol Kap soka tonamen bai kamap long Novemba 13 i go long Desemba 3 long Pot Mosbi.

Sydney bai go pas long wol kap resis bilong ol meri i kam long pek pes

NSW Minista bilong Sport, Stuart Ayres, i tok, intenesenel ragbi lig resis bilong ol meri i strong moa yet na Wol Kap resis bilong ol meri bai kirapim tingting bilong planti sapota.

"Dispela em i bikpela samting bilong NSW long kamapim Wol Kap resis bilong ol meri na Sydney em i namba wan hap long welkamim ol lain bai kam lukim pilai," Ayres i tok.

"Ol meri pilaia bilong yumi i bringim olgeta lain long wol long luk save long dispela gem na mi strongim ol-

geta sapota long kam na lukim Wol Kap resis bilong ol meri long yia i kam."

Bipo, Ragbi Lig Wol Kap resis bilong ol meri i kamap olsem wanpela Festival bilong Wol Kap i soim tonamen bilong ol meri, difens, polis, wilsia na yunivesiti.

Sikispela tim bai resis long Ragbi Lig Wol Kap long wan wan kontinet. Ol Ingran bai makim Yurop, Kenenda bai makim Not Amerika, na Australia, Nu Silan na Papua Niugini bai makim Osenia.

Fainal tim em ol bai makim wanpela bilong Fiji, Tonga, Samoa, o Kuk Ailan bihain long Pasifik Kwalifai resis bai kamap long Oktoba 2016 long St Mary's long Westen Sydney.

Dro bilong Ragbi Lig Wol Kap 2017 resis bilong ol meri em ol bai tokaut long Pasifik Kwalifai resis.

Tiket bilong dabol heda fainal long Brisbane long Sarere, 2 Desemba 2017 em ol bai stap salim long 27 Oktoba, 2016.




Waren Glare, i kisim awod bilong em long han bilong Ruth Waram bilong Oil Search.



Pilaia bilong Butterfly i kisim bikpela takol long ol pilaia bilong Taragau. Butterfly bai go insait long gren fainol bilong Pot Mosbi ragbi lig long namba wan taim



Roger Laka bilong Paga Panthers i redi long autim bal. Paga bai go insait long gren fainol wataim Butterfly long Pot Mosbi ragbi lig long Sunday.



WHITE TUNA FLAKES
DIANA White

WHITE TUNA
insait
K 2.20



Manufactured by:
RD Tuna Canners Ltd.



Tasty and Flavourful White Tuna for Everyone!

Sydney bai go pas long wol kap resis bilong ol meri

PNG NGCB PMs 13l redi



PNG Nesenel Geming Kontrol Bod PMs 13 bai redim ol yet nau long neks wik pilai bilong ol namel long Australia PMs 13. PNGRFL Siaman Sandis Tsaka wantaim Sport Minista Justin Tkatchenko, neming rait sponsa NGCB CEO Imelda Agon, wantaim ol narapela i tokaut long nem bilong PNG PMs 13 long Monday. Lukim stori long pes 26. Foto: Nicky Bernard

OGENAISING Komiti bilong Ragbi Lig Wol Kap 2017 (RLWC2017) i tokaut long Tunde olsem, Ragbi Lig Wol Kap resis bilong ol meri bai kamap long wankain taim wantaim resis bilong ol man long namba wan taim long histori bilong spot.

Gavman bilong NSW i givim sampela mani long kamapim dispela 2017 Ragbi Lig Wol Kap resis bilong ol meri we ol pul resis na semi fainal bai kamap long Sauten Kros Grup Stediam (SCGS).

Ol fainal bilong man na meri wantaim bai kamap olsem dabol heda long Brisbane Stediam long Desemba 2, 2017.

Sif Eksekutiv Opisa bilong RLWC2017, Andrew Hill, i tok olsem, dispela tok save i kamap namba wan taim long histori bilong intenesenel ragbi lig i redim gem bilong ol meri wantaim namba wan ples long soim

wol klas kala bilong ol.

"Dispela em i driman bilong ol Bod long wol kap resis bilong ol man na meri i ken kamap long wankain taim aninit long strongpela sapot bilong NSW Gavman, na mipela i winim wanpela mak bilong spot," Hill i tok.

"Ol etlit tasol i gat sans long soim ol skil na kala bilong ol long olgeta hap long wol na Ragbi Lig Wol Kap resis bilong ol meri bai kamap long yia i kam bai strongim spot moa.

"Ol meri i pilai long ol ragbi lig i kamap bikipela kwiktai na intenesenel ragbi lig resis bilong ol meri i kamap long ol yia i go i soim olsem sampela bikipela senis i kamap long spot.

"Gren fainal resis bilong ol man na meri bai kamap long wankain taim long wankain pilai graun bai pinisim wantaim bikipela Ragbi Lig Wol Kap," Hill i tok.

ridim moa long pes 27

Strongpela Marasin Bilong Kus Gutpela Prais!

Good Products, Better Prices, ikam long

Johnstons Pharmacies Ltd

P.O.Box 1066, Boroko, Papua New Guinea.

Tel +675 325 3185 Fax +675 325 0190 Email sales@johnstons.com.pg

